

ASO LUA, 19 IANUARI 2021

Na tauaofia le Fono Aoaofaitulafono i le itula e 9:13 i le taeao e tusa ai ma le Polokalame o Fonotaga a le Palemene 2020/2021.

Tatalo.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofaitulafono.

FAAALIGA MAI LE TAITAI O LE MAOTA

Na fofogaina e le Fofoga Fetalai le Faaaliga mai le Taitai o le Maota.

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofaitulafono mo le iloiloaina o le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o Faiga Palota 2021.

TUUINA ATU i lenei aso Gafua 18 o Ianuari i le tausaga 2021.

Hon TUILAEPA Dr. Sailele Malielega
TAITAI O LE MAOTA

FAAALIGA MO LE TULAGA FAANATINATI

Na fofogaina e le Fofoga Fetalai le Faaaliga mo le Tulaga Faanatinati.

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofaitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Faiga Palota 2021.

TUUINA ATU i lenei aso 18 o Ianuari i le tausaga 2021.

Hon TUILAEPa Dr. Sailele Malielegaoi

TAITAI O LE MAOTA

FOFOGA FETALAI: Ia, e avea lenei avanoa e faatalofa atu ai i le paia o le Palemene ua mafai ona tatou toe potopoto e faaauau ai le tatou galuega e pei ona valaaulia ai tatou. E ofo alofa atu foi i le tausaga fou e faapea foi le faafofoga tapuai mai a Samoa aemaise foi o lele o lo o tatou faatasi ma le latou galuega faifaipea, o Ofisa Sili o Pulega o Matagaluega ma Faalapotopotoga o lo o faapena ona latou tapuaia faiva ma tuuina mai fautuaga ina ia faapena ona faagasolo ai galuega a le tatou Palemene. Ia, tatou faamoemoe i le Atua ia faapena ona agalelei e fesoasoani mai ina ia faafaigofie a tatou feau ma galuega ma le tatou Fonotaga i lenei taeao fou.

ISI FAASILASILAGA A LE FOFOGA FETALAI

FOFOGA FETALAI: Mo le silafia e le mamalu o le Palemene ua ou taulimaina nei Teuteuga o le Poloaiiga o Faalavelave Tutupu Faafuasei ua sainia e Lana Afioga i le Ao o le Malo.

Ma ou te tapa le Susuga i le Failautusi na te tolaulauina Teuteuga o le Poloaiiga.

Na fofogaina e le Failautusi le Teuteuga o le Poloaiiga o Faalavelave Tutupu Faafuasei.

**TEUTEUGA O POLOAIGA O FAALAVELAVE TUTUPU
FAAFUASEI MO LE KOVITI-19**

E tusa ai ma le Mataupu 105 o le Faavae o le Malo Tutoatasi o Samoa, o Au, Tuimalealiifano Vaaletoa Sualauvi II, O Le Ao o le Malo ina ua uma ona felogonai ma le Kapeneta e ala i le FK21 Faapitoa 2, ua faamalieina tuutuuga e faapea; o se Faalavelave Tutupu Faafuasei mamafatu ua oo mai e avea ma ala o le a lē ono lamatia ai le saogalemu po o le olaga tau le tamaoaiiga, soifua maloloina ma le tamaoaiiga o Samoa;

Ma o lea ua ou faaalua manino atu ai, ua i ai nei Samoa i se tulaga o Faalavelave Tutupu Faafuasei, ua soloia nei le Poloaiga o Faalavelave Tutupu Faafuasei Nu.37, aso 6 Ianuari 2021.

O lenei Poloaiga e amata faamamaluina i le aso 18 Ianuari 2021 seia oo atu i le aso 14 Fepuari 2021.

Sainia i lenei aso 14 Ianuari 2021.

Tuimalealiifano Vaaletoa Sualauvi II

O LE AO O LE MALO

TUUIINA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2020/2021 Nu.63, Lipoti Faaletausaga a le Faalapotopotoga Faavae tau Fatugao a Samoa 2019/2020.
2. P.P.2020/2021 Nu.64, Lipoti Faaletausaga a le Matagaluega o Pisinisi, Alamanuia ma Leipa 2019/2020.
3. P.P.2020/2021 Nu.65, Lipoti Faaletausaga a le Matagaluega o Tupe Maua ma Tiute 2019/2020.
4. P.P.2020/2021 Nu.66, Lipoti Faaletausaga a le Pulega o Tagata Tafafao Maimoa 2019/2020.
5. P.P.2020/2021 Nu.67, Lipoti Faaletausaga a le Matagaluega o Galuega, Felauaiga ma Atinae Eseeese 2019/2020.
6. P.P.2020/2021 Nu.68, Lipoti Faaletausaga a le Faaputugatupe mo le Lumanai Manuia o Tagata 2019/2020.
7. P.P.2020/2021 Nu.69, Lipoti Faaletausaga a le Penisione a le Palemene 2019/2020.
8. P.P.2020/2021 Nu.70, Lipoti Faaletausaga a le Matagaluega o le Palemia ma le Kapeneta 2019/2020.
9. P.P.2020/2021 Nu.71, Lipoti Faaletausaga a le Matagaluega o Aoga, Taaloga ma Aganuu 2019/2020.
10. P.P.2020/2021 Nu.72, Lipoti Faaletausaga a le Pulega o Tinei Mu ma Faalavelave Faafuasei 2019/2020.
11. P.P.2020/2021 Nu.73, Lipoti Faaletausaga a le Pulega o Malae Vaalele 2019/2020.

12. P.P.2020/2021 Nu.74, Lipoti Faaletausaga a le Komisi o Galuega a le Malo 2019/2020.
13. P.P.2020/2021 Nu.75, Lipoti Faaletausaga a le Ofisa Tausi Mavaega a le Malo 2019/2020.
14. P.P.2020/2021 Nu.76, Faamatalaga o Sini Autu a le Ofisa Tausi Mavaega a le Malo 2021/2021.
15. P.P.2020/2021 Nu.77, Lipoti Faaletausaga a le Faalapotopotoga o Suesuega Faasaienisi a Samoa 2019/2020.

TUUIINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2020/2021 Nu.112, Lipoti a le Komiti o Tulafono Tumau i le Tulafono Tau Faaofi o Teuteuga Eseese (Aiaiga o Totogi ina ua Faamalolo le tumau mai le Galuega 2020).
2. P.P.2020/2021 Nu.113, Lipoti a le Komiti o Tulafono Tumau i le P.P.2020/2021 Nu.28, Lipoti Faaletausaga a le Ofisa o le Loia Sili Iulai 2018-Iuni 2019.
3. P.P.2020/2021 Nu.114, Lipoti a le Komiti o Tulafono Tumau i le P.P.2020/2021 Nu.52, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga 2018/2019.
4. P.P.2020/2021 Nu.115, Lipoti a le Komiti o Tupe Maua ma Tupe Totogi i le Tala Faatatau Muamua o Tupe Faaopopo tausaga faaletupe 2020/2021.
5. P.P.2020/2021 Nu.117, Lipoti a le Komiti o le Vaega tau le Va Fealoai i le P.P.2020/2021 Nu.53, Lipoti Faaletausaga a le Matagaluega o le Soifua Maloloina 2018/2019.

TULAFONO TAU FAAOFI O LE FAATATAUINA O TUPE FAAOPOPO (NU.1) 2020/2021 – felafolafoaiga i luga o le faitauga faalua

FOFOGA FETALAI: E tusa ai ma Tulafono Tumau o le faagasolo nei felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2020/2021.

Ia, o le avanoa leni o sui usufono e saunoa ai i tulaga tau tupe ma le tamaoaiga o Samoa faapea Faiga Faavae tau Tupe a le Malo.

Ou te manatu sui usufono e le tatau ona tautalagia i le taimi o saunoaga faalauaitete Mea Taitasi o le Tulafono Tau Faaofi. Faatoa avanoa le Mea

Taitasi i le taimi o le iloiloga auiliili. Ua na o se fautuaga mai le Nofoa, ina ia faapena ona limataitaiina ai saunoaga a sui usufono mamalu.

Ma o le avanoa lenei mo se sui usufono e talamalae i lenei taeao aua le faafofoga tapuai mai a Samoa aemaise o le tatou Palemene.

Ia, e manatua i le loto, talosia o lo o faasolosolo manuia le sui usufono mo Lefaga ma Faleaseela o lo o sii gasegase i atunuu i fafo. E pei o le sui usufono lava lena e talamalae i a tatou talafaatatau po o le tala faaopoopo o tupe, ai o faafofoga mai i le tulaga foi o ala televavave, ae manatu, e pei o avanoa ia ua manatua ai foi lea sui usufono e ese le tapena i tulaga i so o se taimi aemaise o taeao faapenei.

Ia, se i tulai mai le Taitai o le Maota.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ou te tulai atu ma le agaga faaaloalo e faatalofa atu foi i lenei taeao fou i le maleifua mai o le mamalu o le tatou Maota nei aemaise foi le afio o lau Afioga i le Fofoga Fetalai ma sui usufono mamalu o le tatou Maota. O faafogafoga mai foi le paia maualuga i le tapuaiga i Lana Afioga Mamalu o le Malo faapea foi le Sui o le Fono a Sui Tofia ae tainane le tapuaiga i le Faamasino Sili ma le Faamasinoga faapea foi le taputapuai mai a le paia i Aiga ma latou Tama, faapea foi Tumua ma Pule, Ituau ma Alataua, Aiga i le Tai ma le Vaa o Fonoti.

Ae ua ou tulai atu i lenei taeao e avea ia si nei avanoa se i tau faamafana ai lenei taeao i le usuai mai o le tatou Maota nei, o le tatou Fonotaga faaii lenei o le tatou Nofoaiga, ae afai foi ua faatutugata sui usufono, e leai foi se isi e tio, ona ua mamafa i sui usufono le faaiuga o le tatou Nofoaiga ma le tapenaga e tataua ona fai. Ae feoloolo nai a tatou galuega o lo o taoto, a o la foi e faatalitali mai le atunuu, pe alu alu alu pe te i ua uma i le po o le Aso Lulu a taeao le tatou Fono aua o lea ou te vaai atu e pei e le o i ai se isi o fia saunoa, a o le Kapeneta lenei, lau Afioga i le Fofoga Fetalai, se ua leva ona fia tutu atu. O le Kapeneta o le Kapeneta e tapena i taimi uma leaga e faigata le tapuaiga a Samoa ma le latou fia faafogafoga mai i a tatou galuega, aemaise o le faaiuga lenei o le Nofoaiga.

Ia na o sina faatupu manatu, ae a faapea foi e tuai mai tatou sui, ia amata ona matou siva atu i le amataga ae mulimuli mai latou. O au sa ou faapea e to le faaaloalo i vaega fou ia e tulai mai, e ui lava e le i aloaia i totonu o le Maota. Manaia lava a latou faigasiva ia sa ou tilotilo atu i ai, sa ou faapea e tamua i le taeao nei, ae o le a matou talitali pea, a o le agaga ia ia te au ma le Kapeneta, o lea ua outou silasila mai, ua matua matou sauni lava pe amata atu foi ia matou, a o le faalavelave, o lea matou te faatalitali, a o lena e i ina le uta a le faimea. O le a lava lou finagalo, e mafai lava ona matou muamua tata ia ona toe avatu foi lea i o ona matou toe tata mulimuli ai lea. E leai lava

se mea e tupu foi i le ava foi lea a Malietoa ma Tuimanua na fai i le moana sausu, e avamua le Malietoa toe avamuli. E avamua le Malietoa toe avamuli. E le faapea o le a tatou alu ai pea, e mafai foi ona tatou alu faaleaganuu, e amatamea matou toe faaiumea matou. Ia o si fesoasoani atu lena i lenei taeao ona o lea ou te vaai atu ua faatutugata le Maota.

FOFOGA FETALAI: Ia manatua foi e lau Afioga e i ai le faitauga foi lea a le fia saunoa se sui usufono, o lona uiga o la ua i ai lona finagalo atoatoa i se mataupu.

O le mea la lea ua matau atu e le Nofoa, malo faafetai, e le tau selu atu. Ia o le a faapefea ona tau... o lenei lava mea na tatou omai i le 5 tausaga lea ua faaiu o lea lava e faapupula ma faamalamalama? A o le taua o ia mea, o mea e vaaia e fofoga. Ioe, o mea e mafai ona vaai. O le mea la lea faafetai... ae...

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga, ona o au foi o le isi lea ou faalupega, o au o le Taitai o le Maota, e ui lava e le fia faalogo i ai isi, a o le ta galuega e faitoalua. O le isi mea e mafai lava ona ou tuualalo, ae a pe a tuu mai i luma le tatou malologa mai le 10 i le taimi lenei, ia atonu e oo atu i ai ua tapena foi le Maota nei i a latou saunoaga. O le uiga lava lea o Fonotaga faapenei, e usu loa i le taeao, e le tea lava le matafefe.

FOFOGA FETALAI: Faafetai. Ia, o le popolega ne i matau mai le atunuu faapea ai na tatou omai tatou te malolo. E pei o le itu lea lau Afioga e, faatoa uma foi ona malolo anapo a o lea foi o le a toe malolo i le taeao o lea e le i... ae lafo atu ia i sui usufono mamalu e faapena ona...

Tofa Hon Faasootauloa Pati Taulapapa (Gagaemauga Nu.2): Lau Afioga i le Fofoga Fetalai, ia avea ia lenei taeao fou e avea ai lou sui usufono e tamua e fai se viiga o le Atua i lenei taeao fou.

FOFOGA FETALAI: Ia, o lea ua tulai mai le sui usufono mo Gagaemauga Nu.2 o se tasi o sui usufono matua o lea Itu o le Maota, o le Minisita Lagolago o Faatoaga faapea foi Faigafaiva.

Ia saunoa ia lau afioga i le Alii Matua le tuua o Saleaula.

Tofa Hon FAASOOTAULOA PATI TAULAPAPA: Faafetai le Atua i lo matou ulufale mai ma le matou ulufafo atu, o lo o soifua oe i le mea lilo, e amata mai nei seia oo ina faaumaina lenei Paeaiga. E avea ai Saleaula ma fofoga taumolimoli matou te momoli atu le agaga faafetai i le Atua, faafetai i le aufaigaluega tofofi a le Atua o lo o latou faia le tofiga o le tatalo i le po ma le ao ia a'e manuia faiva o Samoa. O Samoa e le o se atunuu taliola, o le

atunuu ua uma ona tofi. O Aiga ma Tama o Tama ma o latou Aiga, Aiga i le Tai ma le Vaa o Fonoti. Samoa e le toe lauliliuina ou paia ma ou mamalu, o sa ma faiga, e te masani i lou tulai, e te masani i lou nofo, o lau tautala o lo o faapena ona nofo tapuai ai Samoa.

Faafetai i le aufaigaluega paia a le Atua, ua i ai nei le Palemene o Samoa i le faaifoifo o galuega fai o lenei tausaga. O le agaga faafetai o Saleaula, o Saleaula o le atunuu tofi, o Saleaula o le Pule, o le atunuu mavae. E momoli atu le agaga faafetai Saleaula i lau tapuaiga. O Saleaula foi e le tu soo, e le sii soo foi tulaga o mea faapenei. Na o le pau lava le mea o le momoli o le agaga faafetai.

Faafetai i lau Afioga i le taitai o le Fono Faitulafono a Samoa lau Afioga Tuilaepa Sailele Malielegaoi ma lau Kapeneta. Faafetai i le Palemene i sui usufono o lo o faaolioli mai aua sailiga o manuia o Samoa ma ona tulaga faalupeina.

O lou agaga faafetai, ou te faafetai i lou itumalo, faafetai Saleaula i lau tapuaiga. Ou te talitonu, i lou i ai i le Palemene, ou te tu ma lou faaeteete ma lou migao i so o se mea ou te tautala ai, ou te tautala i la outou faaiuga. O lea ua avea au ma sui usufono o le tatou nuu, o lea ua ou faamavae i le tatou nofoa Saleaula, e leai lava se mea o gase i lau tapuaiga ma lou tulai atu i totonu o le Palemene. O a taumafaiga ma fuafuaga lea sa ou taumafai i ai aua le atiaeina o le ta itumalo, ia, ou te le selu atu, ou te le tau laulauina atu. O lena e te silafia mea lelei uma ua tulai mai. E le o au, e le o le Malo, a o le Atua o lo o soifua lea e ana lana faasoa. O le mea lea ou te talitonu ai, po o le a lo'u lelei ma o tatou lelei ma le tautuaina o upufai o Malo, a aunoa ma le Atua, e leai lava se tatou mea e mafai.

Ina ua ou tulai mai, sa o nisi o le tatou nuu i uta i le vao, ua afaina le gataifale. Ua a nei? Lea ua uma le tatou taligalu ma toe foi ai le tele o le tatou nuu i tai, ona o galuega lelei sa fai. O lea ua tulai mai le tatou faleaoga, i lou taimi lea. Ou te le gugutu atu pe ou te fai atu, e le o sou malosi, ou te le sii soo, a o le faasoa, faasoa mai le Atua, lea ua i ai le tatou faleaoga ma le malae e galulue ai. E tele galuega lelei ua faia, lena ua i ai le tatou vaiinu, o mea uma faapena, o lea ou te tautala ma lou faaaloalo, ua ou nofo ma le nofoa o Saleaula, e leai ma se mea ua ou faia e afaina ai lau tapuaiga Saleaula, Alii e Lua Maopu ma Sa Peseta ma lau faatufugaga Saleaula. Lau faasoa lea ua ou malolo ai ma lou agaga faaaloalo, e momoli atu le agaga faafetai. E le o sou malosi, o lea ua oo ou tausaga i le mea na fai mai ai le Atua, a 70 loa ou tausaga ona e toe foi lea i le pepe. E leai ou te le foi i le pepe, o lea lava ou te matua, a o lea lava ou te tautua i le tatou itumalo, o lea ou te tautua i le Malo. O le mea lea ou te fiafia ai lava, pe alu lava lenei aso o ou lauga, ia nonofo ai pea aua o la e sa fiu e tauanau nisi e lauga, o lau lauga e le faamutaga e se isi lau lauga. O le mea lea ou te faafetai ai ma ou mitamita ai, faafetai i galuega lelei ua faia.

Faafetai foi i Patī faaolioli. O a taumafaiga o taumafai ai, ia tatou tatalo i le Atua, e pule le Atua i mea uma. So o se galuega fai, tatou o i le Atua, tatou o i le aufaitatalo. E leai sou malosi, e leai se malosi o le Malo lenei pe a aunoa ma le Au Sa Levī o lo o latou tatalo i le po ma le ao, ao ma le po. O le mea foi lea ou te faafetai ai i lenei taeao fou, faafetai mo mea lelei ua tatou maua i lenei vaitau. O a mea ua aumaia e le Atua i lenei vaitau, ia, o le viiiga lava ia foi i le Atua, aua tatou te talitonu o le Atua lava tatou te maua ai mea lelei.

Faafetai mo lau Kapeneta. E le selu atu, o mea foi ua lelei o mea foi ua leaga, a o le mea sili lava o le faatino o mea o lo o manao ai le itumalo lava ia. O le mea lea, Saleaula, o ai ua outou filifilia, ia, toe faatu mai. Lagolago mai pei o au lea ua ou faamavae, faamavae lava e leai lava se pona, leai se mea o ponaia ai la outou tapuaiga Saleaula. O lea foi e talitonu, o lea ou te manuia, o le a ou nofo manuia ai lava. E te le o fia ai e te le o fia inu, na o le mitamita i mea ua faia e le Atua e tatou te olioli ma fiafia ai. Fai mai le tusi a Salamo lava ia, “O le e nofo i le mea lilo, o i ai le Silisili Ese.” Samoa tatou te saili i o ma o, tatou o i le Atua, o i ai le Pule aoao i lou malosi ma lo tatou iloa, e faapena ona faasinomia mea uma tatou te mananao ai. O le Atua o le tali i sou manaoga, e le tali se, o a mea lelei ua faia e le Malo o mea mai le Atua. O le mea lea ou te fiafia ai lava e avea ai lenei taeao ma taeao ou te faafetai atu ai, i so o se Samoa o faapena ona lagolagoina le tulaga o mea lelei o faia e le Malo mo i tatou. Tatou te talitonu foi, o ai foi le Faigamalo e o mai, o mea na mai le Atua, e pule le Atua i so o se mea. Aua tatou te mitamita i le poto aua tatou te mitamita i le malosi, a o le Atua poto e puipui i lou ulufafo ma lou ulufale, fai mai e amata atu nei seia oo lava ina e toe alu ese.

O le mea lea faafetai tele i lau Afioga i le Fofoga Fetalai, faafetai mo lou avanoa e momoli atu ai lau faafetai i lou itumalo, faafetai i le Malo mo galuega lelei. O a mea ua faagaogao ona o lo outou vaai i le Atua ma lona finagalo ua mafua ai ona maua lenei mafutaga fiafia. Ua ou amata i le Atua, o lea ua ou faaiuina i le Atua, o le a ou malolo i le finagalo o le Atua. Ona o le Suafa o Iesu, manuia le tatou Fono.

FOFOGA FETALAI: Malo faafetai. Ua talamalae le tama matua ia Faasootauloa, malo e logo i tino a matagi lelei i le saunoaga, ia faapena ona maua pea lou malosi. O le Atua e foai le malosi e faapena ona faaauau ai pea tiute ma faiva. Ae faafetai saunoa, malo le talamalae. Faamanuia le Atua ia te oe le toeaina.

O lea ua avanoa le tatou Palemene. Tulai maia se isi sui usufono.

Tofa NAMULAUULU SAMI LEOTA (Faasaleleaga Nu 2): Sa i ai le manatu e muliai se faamatalaga ona o le matou Komiti lea sa feagai ma le

Komiti o Tupe, ae semeamanu o lea ua maua lea avanoa lau Afioga i le Fofoga Fetalai. O le a faatea atu ai loa se faamatalaga a lo matou itumalo.

FOFOGA FETALAI: Tulai mai le sui mo Faasaleleaga Nu 2. Malo le manatu i le avanoa o le tatou Fonotaga. Ua e le manatu o oe o se tasi o le Komiti o Tupe ae ua e manatu i le avanoa maumau o le tatou Fonotaga. Tulai mai e saunoa.

Tofa NAMULAUULU SAMI LEOTA: Lau Afioga i le Fofoga Fetalai, ou te fia fou a le atulagi aua le taeao maua i le agalelei o le Atua ae lilia lava i le ata lafoia o le tama na moeaitino i le Alataua. O lea ua e maea ona e tapa tulia i le tata. Ua e faalanu foi le tapui aua le tatou vatapuia ma le Atua, o mea sili ona tatau ma onomea. O upu masani lava e a tatou e fuafua, ae a aunoa ma le faatasi o le Atua ia te i tatou, ia e fai vavale lava o tatou faiva. Faamalo faafetai i lau Afioga.

E faatalofa atu i lau Afioga i le Palemia, ae a le vasega o le Kapeneta, Afioga i Minisita Lagolago, aemaise foi lenei Itu o le Maota, i Taitaifono ma sui Taitaifono aemaise sui mamalu uma o pou faifaia o le Palemene o Samoa.

E faatalofa atu i le tapuai mai o Samoa i ona itu e fia, mai itu o mauga maualuluga seia paia le taele o vanutaliua. Aua le tapuaiga i lau Afioga i Le Ao mamalu o le Malo ma lau Masiofo, afio lau Afioga i le Sui o le Fono o Sui Tofia ma lau Masiofo.

Le paia o Samoa atoa aua le paia i Aiga ma a latou Tama, le Usoga a Pule ma Tumua, Ituaui ma Alataua, Aiga i le Tai ma le Vaa o Fonoti.

E faatulou atu i lau Afioga i le Faamasino Sili, lau Afioga i le Peresetene ma le Matagaluega o Faamasinoga.

E faapitoaugafa sau faatalofa i le aiga sa Levi, le afaigaluega tofofi a le Atua o lo o faanonomanu i le ao ma le po aua se manuia o lau Palemene, aua se manuia o Samoa.

E le faagaloina Ofisa Sili o Pulega o Matagaluega ma Faalapotopotoga Tumaoti a le Malo o tautuaina le Palemene ma Samoa i ona matavai eseese, e faatalofa atu. Afio foi lau Afioga i le Failautusi o le Fono ma le mamalu o le Ofisa o le Fono.

Ou te manatu o paia o Tiafau, o le a taoto ia faalaaui mamafa, matou te le toe tapueina faalaaui mata. O lele ua taoto a o se eleele ua maea ona faatoaina. E motu foi a o se fuluula ua manaia, taalolo laia.

Le mamalu e o si ou itumalo, i ona paia faalupe, aouliuli se itula ona liu lea o le iuofe a tautai, ma ou afe atu aua la outou tapuaiga mamala, ia tapuai maia.

Lau Afioga i le Fofoga Fetalai, o se aotelega o le manatu o lenei itumalo, o le agaga o le faafetai. A tatou tomanatu i le amataga o lenei tausaga, ma le 12 masina talu ai, tele luitau. E tele faafitauli sa feagai ma i tatou, aemaise o

le faamai oti ua faapea ona osofaia ai itu eseese o le lalolagi. Ae a? A lea o lo o sao lava Samoa. Aisea? O le lelei o lana taitaiga. E momoli ai le faamalo i lau Afioga i le Taitai ma le Faigamalo. Aemaise foi le Komiti faapitoa ua faapena ona tofia e le Malo aua le puipuiga o Samoa mai nei faamai. E le itiiti lea vaega, ioe e le itiiti. Sa ou faitau i le lipoti i le faatinoina o tiute, o le faatinoina o tiute o i latou o lo o faapea ona i ai i le front line, o i latou o lo o pito i luma, aemaise o le siakiina o vaa aemaise o le malaevaalele, e to lou pulou. O le mea moni, e ono afaina soifua o auauna ia o le atunuu. Ae sa outou faia le tautua ma le mataalia ma le mataala, ona o lo outou alolofa ia Samoa. Faamalo faafetai.

O le matou faafetai lona lua, e ui o lo o tele luitau o lo o tuuina mai ma faapena ona faafesagai ma i tatou ae o lo o mau lava le toovae i le taitaina o Samoa. O lo o faagasolo pea galuega e pei ona fuafuaina mai le amataga seia oo mai le faaiuga o lenei Paeaiga. O lo o faapena lava ona faatino a tatou auala, faatino a tatou taligalu. Tatala faleaoga, faapena ona faaleleia le tatou internet, faagasolo Fonotaga e pei ona masani ai, we go on life as normal. O lo o faapena ona faatinoina lo tatou ola faifai pea, e leai se mea o atugalua ai, o le agaga faafetai lea. Ioe, e i ai taimi ua le tutusa ai foi, tulaga e i ai, tulaga i le tamaoaiga o pisinisi, tupe maua ma isi vaega. A o lau faafetai, a tatou tilotilo i isi atunuu o le lalolagi, e sili atu ona faaletonu na i lo tatou. O atunuu o lo o i ai le tamaoaiga, o lo o tele le tamaoaiga e ono puipui ai faamai i le oo mai i totonu o le latou atunuu, e le i mafai. E le i mafai, e faitau afe faitau afe ua maliliu ona o lenei faamai. Ae o le faafetai, o lea lava o lo o tulutului le alofa o le Atua i si o tatou atunuu o Samoa. O le isi mea manaia ua fanau mai i lenei faamai, ua mafai ona toe fesui ai a tatou aga ma le faatinoina o le tatou aganuu. Ioe, ua tele le faamama avega i aiga, ua tele ina toe agai le atunuu, agai atu e galulue i fanua a uta, ae a fanua a tai, o le faafetai lea. Ou te vaai au i le tele o le positive o le mea lea e tupu mai. Aua tatou te vaai po o a faaletonu o lo o tutupu mai ai. Sema se taeao toe foi Samoa i le mea na i ai, ae o le faafetai lena. O lo o tumau lava le atinaeina o si o tatou atunuu. O le taimi lea sa sau ai le tala ua maua le tasi pe lua cases i Samoa. O le a le mea na i ai, na matua tatou fefefe, popolevale, imagine la pe ana taunuu mai le faamai i Samoa. O le mea lena e le mama ai i lenei itumalo, le tulaga ua i ai Samoa. O lea o lo o saogalemu i le alofa ma Lona agalelei, faatasi ai ma le nofo tatalo a nofo a faafeagaiga o si o tatou atunuu.

Lau Afioga i le Fofoga Fetalai, masalo o le luitau tele lea o lo o feagai ma Samoa i le taimi lenei, e pei foi ona tauologologo mai e le Taitai ma lo tatou Malo. O suiga o le tau, e le itiiti le faaletonu lea. O lau faafetai, o lea o lo o agai lava galuega a le Malo agai atu i le faatoaia ma le faaleleia o nai vaega ia. A lea na tatou matauina i nai vaiaso talu ai. Nai tamai timuga lava, faapena ona tetele lologa. Ioe, faapena ona afaina itu e fia o Samoa. E faapena foi i si ou itumalo, mai i Sapapalii agai atu i Fusi, Fatausi, Fogapoa ma Tuasivi. Sa ou tatalo atu ai foi ma talosaga atu ai i le amataga o le tausaga,

i le tulaga o taligalu. O le taimi ou te le i faipule, na ou faapea, pau lava lea o mea e lauga ai faipule, o auala o taligalu, o faleaoga. A faapea e faamanuia le Atua, ou te alu atu sui se isi mea ou te tautala i ai. Ae a? O lea ua ou vaai i le mafuaaga. Ioe, e i ai le taimi sa ou tafao ai i le isi o matou aiga i gatai o Sapapalii, ia ua sau lava le galu sau i totonu o le tunoa, vae atu le faafofoga a Samoa. O le talosaga, o lea ua maea ona matou feiloai ma le Matagaluega o Punaoa ma Siosiomaga faapena foi le Matagaluega o le LTA, po o Felauaiga ma auala eseese. O lea ua maea ona tuuina atu le matou talosaga, se i vaai tino i ai po o fea e ave i ai le priority. O le isi pitonuu o matou i Mataga i Fusi, matuai sopo mai lava le galu ua faapea ona ati le fanua i tai. O le talosaga lea i lau Afioga i le Minisita, a mafai ona fai se isi o vaega ia ae le i maea lenei Paeaiga, faafetai. Faauma laia pe a e toe taliu mai i le isi Peaiga o le a lumanai nei.

FOFOGA FETALAI: Ua e silasila atu o la ua toe punou le Minisita e toe tusi au mea na.

Tofa NAMULAUULU SAMI LEOTA: Faafetai, o le ala tonu lea na ou fia muamua ai. Ia faamuamua i luga le lisi a si ou Itumalo e le Afioga i le Minisita. Faafetai Papalii.

FOFOGA FETALAI: Amuia oe faaauau le saunoaga.

Tofa NAMULAUULU SAMI LEOTA: E momoli le faafetai i le Malo, i le auala lea ua agai atu i uta mai Fusi Safotulafai e agai atu i Patamea. E ese le manaia ma le laulelei, e ui o lea sa osofaia e lologa talu ai nei, ae momoli atu le faamalo i Konekarate o lo o feagai ma nafa ma nei galuega. Ou te asiasi atu i le vaiaso na tea atu nei, ua amata ona toe faaleleia. Ae o le tatalo, lau Afioga i le Minisita ma le Malo, o le manaia ia o le model lea ua faataitai i tua i Aleipata. Le auala lea e alu atu i uta i Tiavea, lea ua fesootai mai i ai auala ia e i Aleipata i tai. O le mea moni ua tupu le nuu, ua ola tagata. Ae taatia atu i luma o lau Afioga ni auala kolosi, mai le auala tele i tai agai atu i uta i le auala lea i Patamea. O lea ua maea le auala i Eevee, a o se auala i ina i Fatausi, Fogapoa ma Tuasivi ma le atu Amoa. Aua o le tagi lava ma le leo lea o lo o lagona, maumau pe ana i ai ni auala e fesootai ai i uta, e faapena ai foi ona agai ai i uta le mamalu o le atunuu, e nofoia leaga ua amata ona le toe saogalemu le toe nofo i tai i eleele tu matafaga.

O le isi mea lau Afioga i le Minisita, e manatu ua maea ona faatino foi fuafuaga a le Matagaluega. O le auala lea e sili ona faapena ona identify, po o faailoa e vave ai ona saogalemu ona aveeseina mai tagata mai le falemai tele i Tuasivi, pe a oso se galuafi ma se galulolo, o le auala lea e i totonu o Fogapoa ma Tuasivi. O le tatalo, tuu atu i ai lau faamuamua i le tulaga lea mo le agai i luma lau Afioga.

O le vaega mulimuli lau Afioga i le tulaga lea i auala sima. Faafetai ua maea le auala lea i Maliolio. E 3 lava auala i le agai atu i le itu lea i le matou itumalo, e faapena loa ona tafe loa vai e tusa pe o ni tamai tafega, tamai timuga e matuai poloka lava le auala. O le auala lea i Sapapalii, o le auala lea i Lano, ma le auala lea i Maliolio. E momoli atu le faafetai i lo tatou Malo, o lea ua faatino le auala lea i Maliolio, aua o le auala lea, e le faapea na o tagata o le Itu o Tane e penefiti ai ma faamanuiaina ai. E manuia uma ai le itu o le itumalo, e manuia uma ai Samoa o lo o femalagaai i luga o nei auala. E 2 la auala ia o lo o totoe, ua maea foi ona ave le matou tuualalo i le Matagaluega o Galuega. O le auala i Lano ma le auala i Sapapalii. A fesiligia lou sui usufono, o fea le auala sima e tatau ona faamuamua? O le tali, o Sapapalii. Aisea? Aua foi o lea ua i ai le auala alo mai uta mai Patamea i Fusi Safotulafai, ona flow ai lava lea o le traffic. Lau Afioga e na o se fautuaga ma se tuualalo.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui: Ou te faamalo i le sui usufono le faamanatu mai. O le masina talu ai sa fonu ai le Komiti Faapitoa mo Atinae. Ma o lea sa faatalanoa ai auala ia e lua e fai uma i le taimi e tasi. E le i iloa le taimi e faatino ai, ae o lea ua i totonu o le faaiuga a le Komiti a le Kapeneta ona e taua tele, e le mafai ona faamuamua le isi, e tatau ona alu lua uma auala. E le lelei i le vaavaai mai foi a le isi itumalo, ua faamuamua le isi ona o tulaga ia e vavalalata auala ia. O le tulaga foi i auala ia i le alu atu i tai i le atu i tai i le atu Faasaleleaga agai i le auala alo lea, e tau o le auala alo aua o le auala sa feoai ai le tatou motu tele le atu Asau i le saoga lea e alu atu i Fusi e pio i uta i Vaiaata, ma le saoga lena e alu atu tau i Patamea ma Maliolio. O le auala tuai lena sa masani ona faimalaga atu ai le toatele o le atu Asau e vave, e le i uia i tai. O lea la toeitiiti agai atu ina tau faamaea le auala lena. O lona uiga o le a televave ai femalagaiga, o se auala e le gata ina faafaigofie ai faigamalaga mo le motu i Salafai ae faapena foi i le motu o Upolu nei pe a malaga atu i faalavelave fai.

Lau Afioga i le Fofoga Fetalai, o le faamalamalamaina lea o le vaega lea.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese): Lau Afioga i le Fofoga Fetalai...

FOFOGA FETALAI: Malo, manaia ua manino lea itu. Saunoa mai le Minisita o Galuega Tetele a le Malo.

Susuga Hon Papaliitele Niko Lee Hang: Faafetai mo le avanoa. Faafetai foi i le Palemia mo le faamalamalamaina o le tulaga o auala ia. Masalo e lelei ona tali atu loa i le taimi lenei, ona toe tali atu lea i se isi taimi mulimuli. O auala fou ia e talosaga mai ai le sui usufono, e oo i uta i le auala fou lea, i le taimi foi lea o faaletonu o le tau. O lea ua faamauina ona e fou galuega ia. O tulaga i ala sima ia e saunoa i ai le sui usufono, o la ua survey uma galuega ia e 2. O lea la na saunoa le Palemia afai e fai, e fai faatasi, e le faamuamua le isi galuega ona o le fesoasoani e tasi na aumai e fai ai le tatou galuega na aumai i le World Bank. O lea ua faagasolo galuega ia, masalo po o le a le finagalo o le Atua ae toe tulai mai foi e avea ma sui usufono, po o le a foi le valaauina i se isi avanoa. A o lea ua faamaumau e se isi taitai e tulai mai i le Nofoa lea ou te nofo atu ai. Ma lou faaaloalo lava.

FOFOGA FETALAI: E i ai le upu foi lele, o lea ua taoto le ata o Tauleleia ae taatia le ata o Maluafiti e pei o le fetalaiga i le tama Savaii o Samoanagalo. Tulai mai e faaauau le saunoaga.

Tofa NAMULAUULU SAMI LEOTA: Faafetai tele i lau Afioga i le Fofoga Fetalai. E tele lava nai mataupu na ou fia talanoa ai, ae leaga o lea ua manaia le tali mai o le Palemia ma le Minisita, ou te manatu ua lava ai foi lenei lauga.

O le a fai lau faafetai. Lau Afioga i le Fofoga Fetalai, se ua faafetai i lou valaauina aua le taitaina o le Fonousu a Samoa. O lea ua ou matau atu o le a seu i fanua le vaatiu ma taliu le uto. Ua faamalo le tautua atunuu i lau Afioga. Ua faamalo le faataumamate ma le soatau e pei o le tautai ia laua Matua ma le Fale na to ese. Faamalo faafetai.

Lau Afioga i le Palemia, se ua faamalo le taupaleuu ma le fita i lou valaauina. Se o mau lava a le atunuu, o le tautai e iloa i le taimi e topuepue ai le afa ma le taimi e gatalitalia ai le gataifale. E le iloa se tautai i le taimi e lafo ai le malu. Faamalo le onosai, faamalo le alofa moni ia Samoa. Le Vasega o Minisita o le Kapeneta, faamalo le fai o le faiva, malo le galulue. Faamalo le lagolagosua i le Taitai, i le faafoeina o le sa o Samoa i lenei Paeaiga. O upu masani, e tautala lava galuega. E le o pogisa Samoa i galuega ua faatinoina. Faamalo faafetai.

Le mamalu o sui usufono uma o le Maota, faamalo le folau, faamalo le faatoatoa. O moomooga alofa na, manuia tele le alo atu i le faiga filifiliga a le atunuu. Ou te le faagaloina foi le afaigaluega a le Malo, se ua faamalo le tautua matavela ma le le faalogologotiga. Faamalo le nofo tuavae ma le tautua le foisia, ia tauia e le Atua lo outou fita.

Lau Afioga i le Failautusi o le Fono ma le aufaigaluega ua faamalo le faatauta ma le matagi, aemaise o galu fuliafa ma fita o la outou galuega, aua le tautuaina o sui usufono mamalu a Samoa. Le taimi puupuu lea sa ou i ai i totonu o le Palemene, sa ou vaai ma matau ma le totoa, e le faigofie la outou galuega, faamalo le tautua.

Lau Afioga i le Fofoga Fetalai, muliai sau faamatalaga i si ou itumalo. Ae ou te le i laasia la le fue lavelave o si ou itumalo, ou te muai ulufia maota tapuai o le vaatiu o le Talalelei. E momoli atu lau faafetai tele i ou tama faale-Agaga i lau susuga i le Toeaina Ioane Viliamu ma lou faletua. Lau susuga i le faafeagaiga ia Auatama ma le faletua, lau susuga ia Samoa Unoi ma lou faletua. Ae le gata i lea o le fala na aami i nofo a faafeagaiga ma outou faletua. Se ua faamalo le tatalo, faamalo le faapalepale mai. O le mea moni ua talitelea toga o le nuu sa tua i le niusa, ae tafe tino i vai le mana o a outou talosaga ma la outou tatalo faifaipea. E le mafai, le mafai e se upu molemole ona faalanuina la outou galuega fita. Ua faamalo faafetai.

Si ou nuu o Sapapalii, susu mai lau Susuga i le Nofo lau Susuga i le Malietoa, o le afio o alii. O lau Susuga i le Tapaau Faasisina, susu maia i lou talaga na atoa ma lou fala na folaloea, e faalogo ia te Oe Samoa. Susu Tooa o le Sao na lua i le laueleele ma ona Tei, Sala Moso ma Sala Lea, susu ai Aiga Sa Malietoa. O le Aiga o Nofo o le Aiga o Papa, o le Aiga o Tupu o le Aiga e au i Tafaifa. E susu ai le alalafaga o usoalii, aua a oulua susuga ia Tuilaepa ma Seiuli ma oulua ituvai taitasi. Tulouna oe Mago le Matua, o paia aua Sapapalii o le vaa e tasi e tiu ai Fuifatu. Le paia aua Saleleaalii, Saumaga ma Safaaeesau. Tulouna le malu ia te oe Siuafanua o le itu o le nofoalii, nofoalii o le tupu. Salepologa ma Salefalefa ma lau fetalaiga Fouena. Le mamalu i le faiga, aua Mauga ma I'i ma Tauveletai.

Si ou nuu o Safotulafai, aua le afio o lau afioga Leilua Peaalii ma lo outou aiga Sa Leilua faapea le mamalu o le Toalima o Alii, e afifio ai le paia o le aiga Sa Alalatoa, e susu ai Alo o Malietoa ma le Matua. Alalatai ai i laua na pule o le pule matua, Tuilagi ma Namulauulu. Le mamalu o le Maopu o Tufuga, ma le na aimalae le lautinalaulelei le Vaigalepa ia te oe Safotulafai.

E le faagaloina foi si ou nuu o Tapueleele o le fuaifale na toese e Salevalasi, lau fetalaiga Fuga ma le mamalu ia te oe Safotulafai. Ia ae a le tapuaiga a faletua ma tausi, saoa ma tamaitai le aualuma ma le malosi o le nuu, le aumaga o tofiga.

Ou te faafetai atu i lenei avanoa faaauo, na liuliu mai ai alo o le lupe ma lafo aufala ai la outou tofa tumalele ma le faautautaga tatala, e filia ai lo outou atalii, se i ou laufala maea ai galuega sa faatino e le afioga i le tama Sa Alaalatoa e ala i le tofi faipule. O le tofi na faaauau. Se ta te lilia lava i le tai sua, ae lagona lota mafanafana, i lau tapuaiga le leoa. Ta te atu popole foi le vaosa, ae ta te mafatotoga i le mana o a outou talosaga. Se ua faamalo faafetai. Ae paga lea, e le o lilo i le puna sasau, o lele o le a seu i fanua, le vaa o lenei Paeaiga XVI o lau Palemene, ua sina le galu ua api le uli, ua iite

foi fanua a lalo. Aua o lele ua faataumuaava le sa o le Palemene o Samoa. O Faiga Faavae e masani ai o lenei o le a toe poui atu le tofi i aao ma lima o le tatou itumalo. O la outou puleto lea, sa ou laei ai ma lagona ai lota leo i le faalelegafulu a Samoa i le Maota o Tiafau, faamalo faafetai. O lea o le a toe lafo atu e filitupetoa i ai le tofa faatupu ma le faautautaga tausii vaatele aua lo tatou itumalo. Pau lau tatalo, le mamalu e o si ou itumalo, tatou lafo i le Atua lo tatou faamoemoe.

O si au faaoololomaau tau le lagona, aua ne i galo Afia i si ona vao. O le ola e fia aoga mo lo tatou itumalo. E tumau pea i le agaga aua le fia faaauauina o nisi o a tatou galuega ua amatalia, ae le i maea ona faatinoina ona o le utiuti o le taimi.

E faamalulu atu foi i si ou itumalo pe afai ua le au lou pale pe ua le soo foi lou titi i se tautua a lou lenei tagata. Ua pau lava o se mea ua oo i ai le mafai. O le a foi se faamatalaga ua sala, se upu ua laavale i le tatou mafutaga, Sapapalii ma Safotulafai, ia o upu lava a le atunuu, “*E leai se faiva e aunoa ma se maumau, e poto foi le tautai ae se lava lana atu i ama.*” E i ai lava le taimi e faaletonu ai. Ou te tatalo ia maua lo outou finagalo malamalama mai le Atua, ma ia faamagalalo ni sese, a o se tautua le auau a la outou auauna.

Lau Afioga i le Fofoga Fetalai, ia o se tala lea, o se matou sao foi lea. Faamagalalo ni upu ua logovale pe taulaulu i la outou fita faafofoga. E manatu, tatou seu i le Atua e magalalo ai mea uma. Faatai ma se leo o le auauna, ia faamatafi e le Atua lo tatou aso. Soifua ma ia manuia. Faafetai.

Na faaalua le agaga fiafia o le Maota i le patipati o latou aao i le maea ai o le saunoaga a le sui usufono mo Faasaleleaga Nu.2.

FOFOGA FETALAI: Malo faafetai. Ia, e le tau laeia le saunoaga, o le muagagana foi lea, “*Lele ua tu vaga i figota ae olioli livaliva le itumalo i le faafofoga tapuai mai.*” E leai se mea e pau i le saunoaga. Ae le gata i lea o faamanuiaga e faapena ona tatalo ai i le Malo ina ia faatino galuega aua le atinaeina o le itumalo. Ia ua faapea foi ona e oo i paia o le itumalo, ua leai lava se lauulu e pau.

O le mea la lea, e momoli atu le faafetai i lau fetalaiiga Namulauulu, ia leaga o ouluga o tama na pule aua le tootoo o Fuifatu. Ona faapea lea, ia manuia le alofaiva, ia manuia foi le faaiuga o lenei foi Paeaiga. Ae tulai mai se sui usufono e fia faaauau lenei avanoa e saunoa ai i le tatou Palemene.

Ia, tulai mai le sui usufono mo Siumu. Alo ia ia manuia le saunoaga a Asomua ma Aiga.

Afioga FAALOGO IOSEFA SOPI (Siumu): Faafetai mo le avanoa faaauau. Ia, tatou sii faatasi le viiga na e saunia i lenei taeao e faafetaia ai le alofa ma le agalelei o lo tatou Atua Silisili Ese.

Ae avea lenei avanoa e faatalofa muamua atu ai i lau Afioga i le Fofoga Fetalai o le Maota i lenei fonotaga mulimuli a le Palemene Lona XVI.

E fia faatalofa atu foi i lau Afioga i le Palemia ma Minisita o le Kapeneta faapea Minisita Lagolago.

E fia faatalofa foi i lenei itu i Taitaifono ma sui usufono mamalu uma o le Palemene ua potopoto i lenei aso.

E fia faatalofa atu foi i Ofisa Sili o Pulega o Matagaluega faapea Faalapotopotoga a le Malo ua mafai ona auai mai i lenei aso.

E fia faatalofa foi i le afio o Le Ao o le Malo ma lau Masiofo, le Sui o le Fono a Sui Tofia ma lou faletua.

E fia faatalofa foi i le Tafatolu Fefaatauagai o le Malo o Samoa. E faatalofa foi i le susu o Taitai o Ekalesia Kerisiano uma i totonu o Samoa faapea le paia ma le mamalu o Samoa o lo o faafogafoga mai, i tupu ma tamalii, failauga, faletua ma tausii faapea le malosi o le nuu ma itumalo.

Ia o le paia lava lea i Tama ma Aiga, Aiga ma latou Tama, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi o tatou uso i le motu tele o Tutuila ma Manua, i le afio o lau Afioga a le Kovana, le Kovana Lutena, faapea Maota e Lua o le motu i Sasae.

Lau Afioga i le Fofoga Fetalai, e avea foi lenei avanoa e fia faatalofa atu ai i si ou itumalo o lo o faafogafoga mai i lenei itula i le fonotaga a le Palemene o lo o sasao nei, i le afifio o tama ma tina matutua o le itumalo, seia oo lava i se aupito itiiti. O le paia lava lea ia Sa Asomua ma Aiga e Lua, Tuuu ma lo outou Aiga Sa Tuuu, le falelua o Tulafale ia Mano ma Faoagali, Lio o oe o le Fofoga o le Alataua, Utaileuo ma le faletolu. O paia na o si o tatou itumalo mai Siufaga seia paia Faletele.

Lau Afioga a le Fofoga Fetalai, ia o le a agai loa se faamatalaga a lenei itumalo i le Tala Faatatau Faaopoopo Muamua o le Tupe e pei ona folasia i luma o le Maota Fono. Ae talu ai o le avanoa mulimuli lenei o sui usufono taitasi, o lea o le a muamua ai se faamatalaga a lenei sui usufono i galuega foi sa faatinoina e le Malo ma le aotelega i lenei 5 tausaga ua toeitiiti uma atu po o se overview i le tilotilo i galuega ma polokalame sa i ai foi na faamanuiaina ai le itumalo faapea le atunuu.

E avatu se faamatalaga muamua i le suiga o le tau po o le climate change. O le tasi lenei o faafitauli po o mala faalenatura foi ia o lo o feagai pea ma atunuu o le lalolagi, e afaina uma lava vaega uma o le economy o se atunuu i suiga o le tau. Lea na tatou molimauina nei i timuga tetele nei ia Tesema toe oo mai foi ia Ianuari toe timu tetele foi, sa molimauina le tele o mea na faaleagaina i lea taimi. Pau le fautuaga e tuuina atu i le Matagaluega se i tagai totoa, ou te iloa tasi lea vaega ua tataua ona aafia i totonu o fuafuaga mamao a so o se Matagaluega e pei o le fai o design o auala ma tulaga na, ua tataua ona i ai i totonu climate change ma mea uma ia, aua e le alu ese le faafitauli lea ma tatou, o le a tumau pea, ma o le a faateleina le agai i luma.

E tatau foi i le Malo aemaise Tala o le Tupe, ua tatau ona ave le faamuamua i le climate change, tasi lea faamuamua ua tatau ona agai i ai le Malo ona e tuga tele aafiaga o lea vaega.

Ona oo mai lea i le faamai pei ona pesia ai le lalolagi i lenei vaiata, le faamai oti. E faamalo i le aufaigaluega o lo o pito i luma, o lo o latou feagai ma lea faamai i taimi uma, le malae vaalele e pei ona taua e le sui usufono na mavae atu nei, faapea uafu ma so o se femalagaaiga. Faamalo i Matagaluega uma a le Malo o lo o i ai o latou sao i totonu o lenei Faalapotopotoga. Faafetai i le Taitaifono ma Komiti i la outou galuega e le na o le ao e fai ma le po. Faafetai tele i le silasila i le atunuu ma ona tagata.

Oo mai lea o se faamatalaga i le misela lea na maliliu ai nisi o le atunuu i le tausaga ua mavae. Ou te faafetai i le Matagaluega o le Soifua Maloloina i le vave foia i se taimi vave o lea faamai e pei ona tulai mai. E ui ina sa pagatia ai aiga i le toesea o nisi, ae faafetai i le vave ona maua o le fofo ma foia ai lea faamai i lea vaiata.

A tagai i le itu o aoaoga, ia, faafetai i le suiga ua i ai nei, e le gata i suega a tamaiti, ua vaaia le agai i luma ua tele se aoga o suiga o lo o faia. E faapena foi le tatou iunivesite i le Papaigalagala ua vaaia foi suiga tetele ua i ai. E momoli atu le faamalo i lea tulaga. Na pau lava se tulaga e talosaga i lau Afioga, se pe ua pau i lalo le tatou taitoafitu. Se i tagai ane i nai itu ia o taaloga faamolemole.

O le itu i faatoaga, ia, faafetai o la e ua uma ona fai le ramp a lou itumalo, ua maea foi ona faataatitia pole i le gataifale. E momoli atu ai le faafetai tele. Faafetai foi i le tele o poloketi eseese i projects lea e fai nei, e i ai le project lea e fai nei i se taimi o le masina leni, ou te iloa o le a tele ina aoga i le aufaifaatoaga, e le gata i le aufailafumanu, a o le aufaifaatoaga lautele. E momoli atu ai le faafetai tele i lea tulaga.

I le vaega o le felauaiga i le laueleele, ia, faafetai i lau Afioga i le Minisita, e molimauina o le a faatinoina nisi o galuega a le itumalo, e pei o le auala i le faletalimalo o le Coconut Beach, o le auala faataamilo i le aai i Siumu, faapea le agai i le falesa Mamona. O lea foi ua maua o le a faatinoina foi se alalaupapa i le vai lea e masani ona poloka pe a tafe le vai. Faafetai tele mo lea tulaga.

Atonu sa ou taua i lau lauga muamua se tasi lea o faafitauli o lo o tulai mai pea i auala i lenei vaiata ona o le leai o se routine maintenance po o le vaega lea o le toe faataina o auala. E pei ua matele lava tatou i le fausia ma tulaga faapena. Na ona tuu atu i lau Afioga, toe tagai i le itu lea i le toe faataatia o se vaega aua le toe faataina o auala. E umi lava se auala pe afai e 3 tausaga toe faata, le isi 3 tausaga toe faata, e umi lava. O le tau i nei ia tatou e tele le timu. E pei o i ina a toaga e faata le auala ona puipui mai lea i tulaga faapea.

Susuga Hon Papaliitele Niko Lee Hang: Lau Afioga i le Fofoga Fetalai, se i toe mafaufau le sui usufono po o le a le isi ana tala la e...

FOFOGA FETALAI: Se i tulai mai le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang: Leai e fia tali atu i galuega ia na faailoaina mai e le Afioga i le sui usufono, aemaise le galuega lea o le a fai atu ai le galuega i ina i le mea foi lea e pa mai ai le vai i tala atu o le faleaoga. O lea la ua fai le tauofoga ma le isi galuega tele lea lau Afioga i le Fofoga Fetalai mo le silafia e le mamalu o le Palemene, o le tatou Cross Island Road foi lele mai Tanugamanono e tau i Siumu, o lea o le a faasalalau le galuega. O le galuega lea o le fesoasoani mai le ADB. O le galuega la lea e fai lava sina tele lava lau Afioga, e toe faalautele ai ma toe fai alavai e pei ona ou fai atu e amata atu i Tanumaganono seia tau i Siumu i le magafa lea e i lalo i Siumu. O le galuega tele la lea o lea ua fuafua e amata i se taimi o lenei tausaga. Ia, mo le faailoa atu i le sui usufono mamalu, o lea foi o le a faaopoopo atu lea galuega e manuia ai lou itumalo, ma isi galuega lena e te saunoa mai ai. O lea ua faamau seia faagasolo atu i ai le polokalame. Ma lou faaaloalo lava.

FOFOGA FETALAI: Ia se i tulai mai, ua matua tele alii galuega a lou itumalo o lea ua fai.

Afioga FAALOGO IOSEFA SOPI: Faafetai. Faafetai i lau Afioga i le Minisita. Leaga o lea ua saunoa mai le Minisita o le a oo i ai se faamatalaga i le galuega lea i le Cross Island Road. E momoli atu ai le faafetai tele. O lea na maua i lalo o le Tala o le Tupe Faaopoopo o lo o i ai nei le auala lea o le a amatalia i se taimi o lenei tausaga. E momoli atu ai le faafetai tele i lau Afioga mo lea tulaga.

FOFOGA FETALAI: Malo. E faamanatu atu i le sui usufono, aua le potu e aisi ae vaivai e faafetai. Ia o faatasi le aisi ma le faafetai. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, na o si mea lea e fia faamalamalama ona o lea sa oo i ai le saunoaga a le sui usufono i le mea lea o le toe faaleleia o auala. E i ai le tatou, masalo o manatu e le sui usufono e i ai lava nai tatou polokalame ia mo le toe faaleleia po o le maintenance. E le faapea la o taofia le mea lena, o lea lava e fai lava ma faagasolo a tatou galuega na, o le faiga o lo o fai ai nei talu mai le taimi sa avea ai foi le Afioga ia Faumuina e avea ma Minisita o Galuega,

sa faataoto mai ai lava i le taimi lena le faiga faavae lea ua faasoa vaega eseese o le auala mo lea fai auala ma lea fai auala, kamupani ia ae faasalalau la. Ma e i ai le fono na usuia i totonu o le Kapeneta ma valaaulia uma ai foi i latou ia e omai e faatalanoa, ona e i ai lava nai faaletonu, aemaise nisi foi o kamupani e le o atoatoa le latou tapenaga i itu tau masini e tui ai le auala i le tulaga foi lea ia barg lelei le faiga o le auala. E pei la o le itu lena leaga o lea e matau mai le atunuu o lea lava e fai a tatou maintenance, ae o se faiga foi lea o lea lava e matau i le faasologa, e tai pei la o Savaii i le mea lea sa ou i ai nei, e sili mamao atu auala i Savaii faataamilo na i lo Upolu. A o le uiga lea o le tau matau atu, e toe fai atoa lava le auala, o le tulaga lena e taua tele ai le mea lea o le vaaiga lelei o auala ma latou foi o lo o faatinoina.

Ae i le matou vaai la i Savaii i le faatinoga lea e faatino ai Savaii, ua atili ai ona lelei kamupani fai auala a Savaii, ua siitia mauuluga lava le latou tomai fai auala. Ia matau la i le lelei o le teuteuina o auala ia, a o i inei la i Upolu, e i ai le itu faigata o Upolu ona e pei e fai si mamafa o timuga i inei. E le gata la i lea, ae o le matau foi i le tele o auala e ese ai ma Savaii, e pei o le tele o le vaega o Savaii e gaoa ona o le lava, a o i inei la e fai si loloto foi lea o le eleele. Ia o lona uiga e tutupu ai pea faafitauli na i le faaleleia atili o auala, ae o lea ua manino, ma o lea foi ua tele le tatou poto masani i suiga o le tau lea ua i ai nei ma le tulaga e tatau foi ona faaoga e mea nei o fai auala le seleni e avatu e faatau ai masini, ia lava latou masini i le faatinoina o galuega. O le mea moni lava o lea ua mauuluga le tomai, ae i ai lava kamupani e le o lelei a latou masini, ma o le mea la lena o lea e tau matauina ai i nisi o kamupani nei e faale lelei a latou masini, e faapena foi ona faaletonu le latou galuega, a o lea lava e faagasolo konekarate i le tulaga lea sa i ai, ia faatoatele a tatou konekarate e uunaia.

Ae pei la o le auala lea e alu atu i uta i Fusi, Vaiaata, Patamea, o lea ou te matau e 4 kamupani na latou te faatinoina le galuega lena, e vave ai foi le latou galuega. Lau Afioga e taua tele le itu lea, ona e moomia foi mea o masini ma le tomai i totonu o kamupani nei e fai mai a latou tauofoga. O se mataupu masalo ua le faatasi a ua faatele ona valaau mai le Kapeneta ia i latou uma nei ma o atu ma matou feiloai ai i totonu o le Kapeneta. O lea e manatua foi e nisi o lena e nonofo mai lena Itu sa i totonu o le Kapeneta, o le taumafaiga a le tatou Malo, ia faaleleia atili le tomai ma le faaleleiga o auala i a latou galuega. E i ai lava foi le faiga ma le le faamaoni.

FOFOGA FETALAI: Malo faafetai. Ia, manaia le saunoaga a le sui usufono ua faamalamalama mai e le Palemia lea vaega.

Afioga FAALOGO IOSEFA SOPI: Faafetai i lea vaega ua malamalama foi. E momoli foi le faafetai i lau Afioga i le Minisita i le galuega o lo o faatino nei i le taulaga, i alavai ma le toe faia lea o auala lea na molimauina i lolovai na se i mavae atu le tele o afaina o alavai. Ia atonu o le a foia ai le

tele o vaega o lea faafitauli. Ae manatua foi o le taulaga a tatou e maualalo lava se vaega o i ai, e pei o i ina a sua le tai, timu, ona le tafe lea o le vai. E pei o le faafitauli tele lena i le taulaga.

Ia oo mai i le Matagaluega a le EPC, faafetai, faafetai i lau Afioga mo le taitaiga foi o lea vaega, o lo o maua lava le tau o le eletise e le o toe i ai se siitaga i le taimi nei. Ia ua ou molimauina foi malosiaga faafouina, atonu o le a tele se sao o le eletise maua mai i i le tau o le eletise mo le agai i luma. E i ai le target lea e i ai a le Malo ia oo atu i le tausaga 2025 ua alu uma tatou i le ituaiga eletise lea mai le malosi faafouina. E momoli atu ai le faafetai tele i lea tulaga.

I le suavai, faafetai ua inu lena itumalo i se vaimama, le vai ua uma ona treat. Faafetai i lea tulaga atonu ua faasopolia pe toetiiti faasopolia Samoa atoa i le vaimama lea e momoli atu ai le faafetai tele i lea tulaga. Na pau lava o le taimi foi lea e tetele ai tafega ma pau timuga, lea e molimauina ai le sua palapala o le suavai se i tulou. Se i tagai lava lau Afioga pe le fai ni reservoir foi a lele e store ai le vai, a oo i taimi faigata faapea ona maua lea o se vaimama i lo le faatalitali lava seiloga ua maea timuga ma tulaga faapena.

Lau Afioga, ona oo mai lea o se faamatalaga i le tamaoiga.

FOFOGA FETALAI: Ia se i toe tulai mai le Minisita mo Galuega, Felauaiga ma Atinae Eseese.

Susuga Hon Papaliitele Niko Lee Hang: Lau Afioga i le Fofoga Fetalai, faafetai mo le avanoa. Masalo e lelei le taimi lena e tali atu ai i le tulaga lea o le suavai. O le naunautaiga o le Malo ia maua uma e le atunuu le suavai mama mo le puipuiga o le soifua maloloina. O le taumafaiga foi la lea e taumafai atu ai le pulega o le suavai e tau faauma mea ia o vai tumaoti. O le agaga lava o afioaga ia e i ai vai tumaoti, ona o la e maua le sapalai o le vai mai tuamaota ma fanua o afioaga ia. A o le popolega lava lea pei ona saunoa le sui usufono a tetele loa timuga, ua palapala uma lava suavai ia. A o le suavai lea lea e sapalai e le tatou SWA, e mama lava i taimi uma, ma ua uma foi ona ave i ai le vailaau mo le puipuiga o le soifua maloloina.

E pei o le mea lea e naunau mai ai afioaga ia e i ai vai tumaoti, e le tologiina se pili, a o le puipuiga la mo le soifua maloloina, e tataua ona puipui i ai ma ave i ai le faamuamua. Ou te iloa o le naunautaiga lena i afioaga ia e i ai le vai tumaoti, ona o la e i ai le vai, ae le o taimi uma, e louloua loa le tau mamafa timuga, palapala loa lea o le suavai, ona saili mai foi lea e le Pulega o le Suavai ni loli vai se i tulou, e o atu e sapalai ni vai mama. O le tulaga la lea, o lea e tapena i ai le SWA po o le Pulega o le Suavai ina ia maua uma e afioaga koneti i le vai mama lea a le Pulega o le Suavai, ae taofi mea ia o vai tumaoti ona e tele le afaina pe a faaletonu le tau.

Ia o le fuafuaga lea e faamanino atu ai i le sui usufono mamalu ona o lea e taumafai le Malo e auala atu i le Pulega o le Suavai e faasopolia le atunuu i le suavai mama lea. Ma lou faaaloalo lava.

FOFOGA FETALAI: Ia, atonu o lena ua faafofoga mai le sui usufono. Se i tulai mai lava le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ona e taua tele le itu lea o le oo atu o le suavai mama. E le toatele afioaga e fiafia lava latou e pulea e latou le latou lava suavai, lea foi e fai i ai le fesoasoani a le tatou Malo. Ae i ai le itu taua, ona o le tulaga masani lava e le o atoatoa foi le vaaiga o le vai. E i ai lava uiga tuai foi lea e tiga lava ona faaletonu paipa ae faaalu lava. Ioe. E faapena foi la i le faatumau o le suavai mama. E le mafai ona galo ia te au matou talanoaga pe a ma le 3 tausaga talu ai ma le isi foi afioaga, o la e ua i ai le vai mama, ae mana'o lava latou e faaola le latou vai tuai. Ona fai mai lea o le tala a le matai matua lea o le nuu, e tusa lava pe palapala le matou vai matou te fia feinu ai lava. E tusa lava pe matou te mamai e matou te fia feinu ai lava ona o le vai e maua fua.

Lau Afioga i le Fofoga Fetalai, e le lelei ia ituaiga manatu. E tele lava le gasegase e tupu mai ai, ae o latou i luga e faia tonu, e ono sese ai le tulaga o le faatumauina o le suavai e maua ai le soifua maloloina. E tele naunau a tatou mai leaga ia e tupu nei, ae afua mai le suavai. Ae pei e laitiiti a si mea lea e ala ona taugata le vai, o le le vaaia lelei e tiga lava ona alu le vai, mama le faleese, se i tulou, a o la e lava e faaalu lava. Ae a lelei lava ona faafoefoe ma faatonutonu le faaogaina o le vai, e leai lava se taugata. Ae ala ona taugata, o le aumai o le pili o la e laitiiti ae le totogiina, ona faaputu faaputu lava lea tele. A o le naunau i le mea lea o le vai palapala ona o le le totogiina o le faafitauli tele lena o lea e faafeagai, e oo lava i le tele o nuu sa pulea e latou a latou lava vai, ma tulai mai ai faiga ia. La ua iu lava ina fai fai lava liliu mai i le Malo. Aua e oo loa lava ina toe faafou ia paipa, ia e le taugofie na mea, e le mafaia e le nuu ona faatino mea ia.

Lau Afioga i le Fofoga Fetalai, o le itu taua o lea e laga le mataupu lena i totonu o le Fonousu a Samoa. A o lea e faafogafoga mai o tatou nuu, o tatou nuu ia e fai pea le latou ma pulea pea e latou le suavai, e le o se pulega lelei i le tele o taimi. E moni e tofi le Komiti, ae o isi Komiti na e sili ona le faamaoni. E sue ane lava tupe ua le iloa le mea e alu i ai tupe. E oo foi e tiga ona leaga ia vai, ae faasigasiga lava. Lau Afioga i le Fofoga Fetalai, ua tatou masani ai lava i mea ia. Ma e taua tele le lagalaga i totonu o le Maota lena, o la e faafogafoga mai afioaga ia, e le lelei le tulaga o le tuufau o vai e pulea e nuu lava latou, o le mea lena e oo i ai, o le palapala.

FOFOGA FETALAI: Atonu e aoga uma mo tatou ia le fautuaga lea ma le finagalo ua faamalamalama e le Palemia aemaise o le Minisita. Aveese le agaga foi lea pe mamai pe a ae o le mea sili ia maua fua. A ave ifo la le maua fua e fai ai le mai, ioe e faapena, taumafai tatou e ave i ai le talaiga o lea ua tatou malamalama tatou i le mea lea. Ae tautuana ma oe le sui usufono afai o aafia ai lou itumalo, taumafai e fai le mea lena.

Na faataatiaese Taulumaga a le Fono Aoaio Faitulafono mo lana malologa masani i le itula 10:45 i le taeao ma toe faaauau i le itula e 11:45 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.

FOFOGA FETALAI: Ou te faasilasila atu ua toe amatalia galuega a le Fono Aoaio, e manatu ua maua le malosia o le Palemene e faaauau ai le tatou fonotaga ma le galuega.

E faia le malologa o saunoa le sui usufono mo Siumu. Ma le faaaloalo ou te tapa lau afioga i le sui mamalu e tulai mai e faaauau le saunoaga.

Afioga FAALOGO IOSEFA SOPI: Faafetai i lau Afioga mo le avanoa, avanoa muamua o lo o ua tuuina mai. Atonu ua maua se faasiligamalosi o sui mamalu i le taumafataga na alo atu i ai le Fono mamalu faapea Ofisa Sili o Pulega o Matagaluega a le Malo. O le a faaauau se faamatalaga, ou te iloa, pe sao o le a toe amata le lauga ua 30 minute faaopoopo pe leai.

FOFOGA FETALAI: E le tau fautuaina le tatou Tulafono Tumau, tulai mai le sui usufono.

Afioga FAALOGO IOSEFA SOPI: Faafetai i lau Afioga, o le a faaauau le lauga a lena itumalo. Ona oo mai lea i le vaega o le tamaoiga o si o tatou atunuu. E molimauina lava mai lea tausaga mai lea tausaga, o lo o alualu lelei pea le tulaga i le tamaoiga. A pau i lalo e pau i lalo e pau laititi, a sii e sii laititi. O lo o lelei mea uma, e vaai atu foi i le Tala Faaopoopo o le Tupe, e leai se mea e ono faapopoleina ai le paia ma le mamalu o si o tatou atunuu, o lo o lelei lava le faatautaiga o lea tulaga. Ae momoli atu le faafetai i le Matagaluega o Tupe Maua, o outou lea o lo o tausailia le tele o seleni o lo o faaogaina i galuega eseese a le Malo. E matauina lava e lou nei sui usufono i tausaga uma e aumai lava e i ai le tupe e faasili atu i luga i le tupe e tatau

ona maua e le Matagaluega. E momoli atu ai le faafetai tele i lea tulaga. Atonu o le a faaauau ai pea lea tulaga i le lumanai.

Ona oo mai lea i le Matagaluega o Tupe, e momoli atu le faafetai i lau Afioga i le Minisita faapea le Matagaluega mo le faasoasoaina o tupe a le Malo. E i ai atunuu tetele o le lalolagi e tele ia vaega e faamoemoe i ai le tamaoaiga, ae o tatou e leai ni vaegatupe faapea. E faalagolago lava i tupe maua ma tupe faasili a Matagaluega.

E momoli foi lau faafetai tele i Faalapotopotoga Tumaoti a le Malo, i latou e tele ina aumai sao i totonu o tupe a le Malo. O tupe faasili ia a Faalapotopotoga e momoli atu ai le faafetai tele i lea tulaga. E momoli atu foi le faafetai i tama ma teine ua avatu i galuega faavaitaimi i atunuu mamao. E tasi lea vaega o lo o tele le sao i le tamaoaiga ma le fesoasoani i aiga ma nuu ma itumalo. E tele le sao o lea vaega i le tamaoaiga o si o tatou atunuu, e momoli atu ai le faafetai e le o afio mai le Minisita. Faafetai foi mo lea tofa ua ae, e pau se tuualalo ia taumafai i isi atunuu e i ai Kanata ma Amerika pe le maua ai nisi galuega, e avatu ai le isi vaega o tupulaga talavou o le atunuu e le o maua ni galuega.

Ona oo mai lea i le Matagaluega o Leoleo ma Falepuipui, faafetai i le tofa ua ae ua mafai ona toe tuufaatasia ia Matagaluega e 2. Ua leva foi tausaga o eseese a o lea ua toe tuufaatasi, e momoli atu ai le faafetai tele. Se i tagai lava le Matagaluega i le tulaga lea, e pei ua agai i luma ia fualaa faasaina i si o tatou atunuu. Se i tagai i ai le Matagaluega i le tulaga lea. O lea foi e pei ona maua e i ai nisi o fualaa na maua lata mai nei, se i tagai i ai. Vaai se vaega faapitoa, e faapitoa lava i latou i ituaiga soligatulafono ia o fualaa faasaina. Ma se i tagai ane ia tau fai ni exercise ma tau faatamomoe leoleo o le a lapopoa tele leoleo o si o tatou atunuu.

FOFOGA FETALAI: Lau Afioga i le sui usufono mamalu, e le iloa le mea e pei a aanoa se lauga e le taofia e le Fofoga Fetalai.

Tulai mai le Minisita o le Matagaluega o Leoleo.

Afioga Hon Tialavea Fea Leniu Tionisio Hunt (Minisita mo Leoleo ma Falepuipui): Sa faapea e le faalavelave i le saunoaga a le sui usufono. Ae ua oo i le tulaga lea ua tuuaia ai le lē fit o le aufaigaluega. Atonu o le taimi lenei lau Afioga, o lo o tele koleniga aemaise foi aoaoga o le aufaigaluega o lo o i ai i le taimi lenei. Ma ua sui foi le auala e piki ai le aufaigaluega. E 17 vaiaso e te koleni ai ma fai aoga ona mafai lea ona avea oe ma leoleo pe a e pasi. O le tulaga foi o fualaa faasaina, o lea lava e taumafai le Matagaluega i le tau vaavaaia aemaise foi o le galulue faatasi o le Matagaluega o Leoleo ma le Matagaluega o le Ofisa o Tiute ma Tupe Maua, i le tau sailiga o fualaa ia mai fafo, ona e tele auala e nana mai ai i totonu o le atunuu ia fualaa nei. Ia ae faafetai na maua le shipment lea na sau i le tausaga ua tuanai. O lea e

tau saili po o ai e ona, leaga e ese igoa la e aumai ai. Ae faafetai ua mafai ona maua, ae o lo o taumafai pea le Matagaluega o Leoleo.

Afioga FAALOGO IOSEFA SOPI: Faafetai i lau Afioga mo le faauilavea a le Minisita. E pau le isi talosaga e tuu atu, sa ou talosaga muamua foi e toe aumai nisi taifau sosogi a le Matagaluega, e tele le aoga o taifau ia aua le sailia o fualaa faasaina, faapea foi tagata femalagaai a le atunuu. E maua le tala faapea e taugata, ae taumafai e toe saili mai nisi taifau faamolemole.

Ona oo mai lea i le vaega o le Va i Fafu. E momoli lava le faafetai a leni sui usufono i le Matagaluega i le tau sailiga lea o sikolasipi a alo ma fanau a le atunuu. E tele lo outou sao i le tausailiga i atunuu i fafu. Ia faapea le va ma Faalapotopotoga tetele a le Malo, e i ai le United Nations ma Faalapotopotoga ia. E momoli atu ai le faafetai tele i lea tulaga. E tele foi nisi taimi e saina ai le tele o isi declarations ma mea na, e momoli atu lava le faafetai i le Foreign Affairs ma le latou pito foi i lea vaega.

FOFOGA FETALAI: E toe 5 minute o le sui usufono.

Afioga FAALOGO IOSEFA SOPI: Lau Afioga i le Fofoga Fetalai, ia faafetai. O le a tau faatopetope laititi. Lau Afioga i le Fofoga Fetalai, ona oo mai lea o se faamatalaga i le Matagaluega o Eleele, e tasi foi lea o Matagaluega e tele foi lo latou sao i le tamaoiga ma le vaaiga o eleele o Samoa. E tele eleele tumaoti a le Malo o lo o i ai, o lo o vaaia lelei lava. E molimauina o lo o i ai foi itumalo o lo o faalavelave ma taumafai e malo i eleele, ae momoli le faafetai i le Matagaluega mo lo outou sao taua, i le vaaia lelei o eleele a le Malo.

Oo mai i le Samoa Airways, faafetai o lea ua maua o le a aumai le tatou vaa fou. O se faamama aveaga lea i le mamalu o le atunuu e feoi i le va o Samoa ma atunuu i fafu. Faafetai mo lea faamoemoe ua ae, e ui lava e i ai se vaega o le afaigaluega ua toesea i leni vaitaimi ona o le faamai, ae momoli atu le faafetai tele i le vaega lea o le Samoa Airways.

Le Matagaluega o Faamasinoga, e momoli lava le faafetai a leni sui usufono, i Tulafono e 3 ia e pei ona tapisa ai le atunuu, lea ua pasia i le taimi nei. Faafetai i le tuu mai o nei Tulafono i luma. E mautinoa lava e leni sui usufono ma sa lagolagoina foi e leni sui usufono ina ia pasia nei Tulafono, ona e talu ai, e tele le aoga i le atunuu. O le isi itu e tagai i ai, se i tatou tagai i Tulafono po o le a le aoga i nei vaitau ua pasia ai.

Lau Afioga i le Fofoga Fetalai, ona oo mai lea o se faamatalaga i le vaega a le Ofisa o le Fono mamalu a le Palemene. Faafetai tele i la outou galuega sa faia i leni 5 tausaga aua le tausaga o sui usufono uma o le Maota. E le gata i le Maota nei, a o taimi o fonu a Komiti ma le tele o mafutaga sa fai. Ou te faafetai i le tele o semina ma conference sa fai, ua tele ai le

malamalama, faafetai i le vaega tele sa faia i le amataga mai o lenei 5 tausaga. E molimau lava lou sui usufono ua tele le aoga o nei aoaoga. Ua tele ai foi se iloa, ma le faiga o tulaga faapolokiki ma le va i fafo.

Lau Afioga i le Fofoga Fetalai, avea ia lenei taimi e molimoli atu ai se faafetai, ua maea nai vaega sa fia oo i ai se tautalaga. Ae avea lenei avanoa faaauro e momoli atu ai lau faafetai tele i lau Afioga i le Palemia ma le Kapeneta, faafetai i le tatou mafutaga i lenei 5 tausaga, i apoapoiga, o timaiga faapea le tuualalo i le tele o taimi ia i matou nei o sui usufono fou. E momoli ai le faafetai tele a lenei itumalo.

E momoli foi lau faafetai i Ofisa Sili o Pulega ma Matagaluega eseese a le Malo, le Loia Sili faapea Ofisa Sili o Pulega o Faalapotopotoga a le Malo. Faamalo le tau, faamalo i la outou galulue. E i ai taimi sa valaauina foi e Komiti eseese, ia e faafetai i le tou sao. Faafetai i lapataiga ma timaiga sa aumai i tofi o le Maota, ua ala ai ona mafai ona faia le tele o faaiuga ma vaega uma o le fonotaga a lenei Palemene. E momoli atu ai le agaga faafetai tele.

Ia e faafetai foi i afioga i Minisita Lagolago, faafetai i lo outou lagolago, lagolagosua i afioga i Minisita. E le faigofie foi ia le tou tuualalo i Minisita, ia faafetai pe afai o sao ia tou tuualalo ma timaiga i afioga i Minisita.

E momoli foi le faafetai i Taitaifono ma sui mamalu o Komiti eseese o lenei itu. Faafetai foi i lo outou sao e lagona lava ma molimauina le tele foi o le sao a Komiti eseese i totonu o le faagasoloina o le Palemene. E tele le sao i timaiga ma lapataiga e avatu, o lo o lelei ma faagasolo ai ia le tatou Malo.

FOFOGA FETALAI: Ua maea le taimi o le sui usufono.

Afioga FAALOGO IOSEFA SOPI: Lau Afioga ao le i avatu, e na o talosaga lava tuua a si itumalo e tuu atu i luma o lau Afioga i le Palemia, o auala galue. E 4 lava auala galue o si ou itumalo pau lea o le talosaga e tuuina atu i lenei itula.

E momoli foi le faafetai i le stimulus package lea sa mafai ona oo atu i le mamalu o le atunuu, o pisinisi ma i latou uma na afaina ona o lenei faamai ua tupu mai i le lalolagi.

Faafetai i le tofa ua ae i le Kapeneta lau Afioga i le Minisita, faafetai i lenei stimulus package. E tele le faamama avega ma le sao i totonu o le tamaoiga ma vaega uma o si o tatou atunuu ma faagasologa o galuega.

Ia e momoli foi le faafetai i le Taitaifono lau Afioga i le Fofoga Fetalai, faafetai i lenei 5 tausaga. E matau lava lenei sui usufono, e le o atoa le malosi ae o lo o lelei lava le faatinoga o galuega a le Fono Aoao a le Malo faafetai tele i lau Afioga mo le faatautaiga o le Fono mamalu a le atunuu.

Ia e fia mulimuli sau faafetai i si ou itumalo, faafetai tele i le itumalo, faafetai i a outou timaiga. Faafetai i Susuga i Faafeagaiga amata mai lava i le Sea i le itu Sisifo, seia paia le faifeau ia Ulavale i le itu i Sasae. Faafetai i

la outou timaiga, o a outou tatalo ua manuia ai se taumafai a le sui usufono ma le taumafaiga i le 5 tausaga. E momoli atu ai lau faafetai tele i si ou itumalo, faafetai i lo outou tusiaao ma le tou tusitusi mai ua ala ai ona mafai ona tu atu le sui usufono i luma o le Maota fono nei. Faafetai i le pule ia outou.

E momoli foi lau faafetai i ou aiga, si o matou aiga potopoto, fogavai i le aiga Sa Faalogo, ia faafetai i le tofa ua ae ia outou, ua mafai ai ona outou tusiaao ia te au, e fai ma sui usufono. E momoli foi le faafetai i ou aiga i Samoa nei ma soo se atunuu o i ai, si ou tina matua ia Solotala i Niu Sila faafetai. Faafetai foi i si ou tina matua i Lalovaea ia Faasiu, faafetai i la outou timaiga i la outou tama.

Ia e mulimuli se faafetai i le tina o tamaiti ma le fanau, faafetai i le lagolagosua mai i taimi uma o Fonotaga, i le faiga o laei, ia o le fafagaina o lenei sui usufono, faafetai tele o la outou pule lea.

Ia ae e le i faauma atu se faamatalaga, ia mo tatou uma o sui usufono o lo o tapena mo le isi faiga palota, ia o mama na. E i ai le tala a le atunuu, 'e le i fausia Roma i se aso se tasi'. E toe oso foi le la, toe taumafai mai i le isi Palemene o lo o lumanai nei. Ia e pei o moomoga mulimuli na o le sui usufono nei, ae ia manuia lava le Fonousu a Samoa, faafetai i lau Afioga i le Fofoga Fetalai.

FOFOGA FETALAI: Ia o lea ua maea le saunoaga a le sui usufono o Siumu. Ia ua avanoa foi mo se isi sui usufono e fia saunoa. Ia tulai mai le sui usufono o Tu Taulaga i Sisifo, lau Afioga Faumuina, Faumuina Wayne ae e le o Faumuina Liuga.

Afioga FAUMUINA ASI PAULI WAYNE FONG (Nuu Tu Taulaga i Sisifo): Faafetai i lau Afioga i le Fofoga o le Fono i le.. sao e matua le isi ae laitiiti le isi lau Afioga. O lea la ua tulai atu Faumuina matua. Ae faafetai lau Afioga i le Fofoga o le Fono mo le avanoa ua tuuina mai i lenei itula, e taumafai atu ai foi se vaivaiga o lenei itumalo. Ia aemaise foi lenei sui usufono, sui o le Palemene o le Malo o Samoa.

E momoli atu le faamalo ma le faafetai i lau Afioga i le Fofoga o le Fono, aua foi le tauaveina o le tatou Fonousu i lenei Paeaiga e oo mai i lenei itula. Faafetai mo mea uma, faafetai mo lou alofa, faafetai foi mo lou le alofa i isi taimi. Ae e talitonu le agaga o lea ua tatou taunuu mai i lenei aso, ua mafai ai foi ona oo mai lenei sui usufono i lenei itula i le faamae'aina o lenei Nofoaiga.

E avatu se faafetai faapitoa i le Afioga i le Taitai o le Malo, le Afioga i le Palemia, ia aua foi le tauaveina o le Faigamalo i le 5 tausaga ua tuanai. I le tulaga foi i le taimi sa o tatou galulue ai i le Vaega Faaupufai a le HRPP, ia e talitonu le agaga e ese sou manatu, ia ese foi outou finagalo. Ae o le mea

e pito sili ona taua, o lea lava e tatou te galulue faatasi lau Afioga i le Taitai o le Malo, ia aua foi mea uma lava o lo o faataatia aua foi le tatou Faigamalo.

Ona oo lea o se faafetai faapitoa i lou itumalo, le itu Taulaga i Sisifo. E matautia foi le tulaga ua i ai le itumalo lenei o le Itu Taulaga i Sisifo, ona o le Paeaiga muamua lenei sa faatuina ai, nei sa filifilia ai au ou te oo mai i totonu o le Palemene. Ia ae o le Paeaiga muamua foi lenei, ua toe aveeseina ai. Ae talitonu le agaga o nei suiga, ia o suiga lava ina ia alualu i luma ia le tatou Faigamalo. O lea la e momoli atu ai le faafetai tele, Susu le Tofa i le Faiga, ia Nuū ma Leatinuu, Susu mai foi Siliga ma Umusa i Siliga ma si o matou nuu i Vailoa. Ia Susu le Seiuli o le Alo o le Malietoa, faapea le Falefia o Alii ia ma le mamalu o le Aiga Sa Ulugia. O latou o lo o puipui i le itumalo. Ia aemaise foi le toatele o le Lautinalaulelei aua lenei itumalo fou ua i ai o Faleata 2. E lavea ai ia Tulaele, Talimataū, Vailoa, Vaiusu, Elise Fou, Falelauniu, Siusega, Tanumapua, Tapatapao ma Laloanea.

E faafetai tele i le tulaga ua i ai le faataatiaga o lenei itumalo. A fuafua foi i le taatiaga a le Faigamalo na i ai, ia e momoli lava le faafetai ona o le tulaga ua i ai i le tulaga lea ua faataatia ai, ona o le toatele o i latou o nonofo, ma papa, alala foi i le itumalo ia aemaise foi latou o sailimalo i totonu o le itumalo, ia o lenei ua fai ai lenei itumalo. E ui lava, e ui lava ina le mafai ona saili outou i se Nofoa mo le Palemene, ae talitonu le agaga, o lo o i ai le tou faatuatuaga, aua le sui usufono o lo o tulai atu, ia mo le tatou Faigamalo mo tausaga i luma.

E ao foi ona momoli atu le faafetai i Afioga i Minisita, i galuega foi sa taumafai ai aua lenei Paeaiga. E i ai lava latou e tulai mai i le lelei o le faafoeina, ia ma le usitaiina o Tulafono aua le tatou Malo. Ia aemaise foi latou o lo o taumafai pea e fai le galuega mo le atinaeina lelei o le tatou itumalo aemaise foi ia le tatou atunuu.

Ona momoli ai lea o le faafetai faapitoa i le Afioga i le Minisita o Galuega, le Afioga ia Papalii mo le galuega fita aua le galuega i totonu o le itumalo. Galuega i auala, auala eseese aemaise ia le auala o Falelauniu lea o lo o faatino i le taimi nei o lo o faaauau lava. Tau saili atu pe i ai se isi galuega lau Afioga i le Fofoga Fetalai ae pei uma lava e na o le pau lena mo lenei itumalo. O lea e momoli atu ai le faafetai tele i lau Afioga i le Minisita ia mo galuega faaauau.

Lau Afioga foi i le Minisita o Tupe, ia e le tau selu atu, lou tulai mai i le tau faasoasoina o a tatou seleni, e ui lava ina le gafatia ae talitonu le agaga o lo o tofufufusia tatou itumalo i faamanuiaga a le Malo. E ui lava ina le tutusa ae talitonu le agaga o lo o tatou tuu i luma o le Atua ia aua foi nisi Faigamalo i luma ia mo tulaga i galuega.

Faafetai foi i le Malo mo galuega ua toe aveeseina o lenei itumalo, e i ai si faleaoga o le matou nuu i Vaigaga ua toe aveeseina ia ae talitonu le agaga, tatou agai i luma. O lo o i ai se taimi toe tafa le finagalo o le Malo ia toe faaauau le galuega a lo matou nuu.

Faafetai foi i galuega e le i faia, ona o tulaga o fuafuaga a le Malo ia ae e pei e le au i ai lenei itumalo, e tai pei o le uafu i Vaiusu. Ae e talitonu le agaga, o lo o i ina le faasoaina. O lo o i ina foi le tomai e mafai ai ona faataatia galuega nei. O lea e momoli atu ai le faafetai tele e ui ina e le i taunuu, ae e talitonu, e le taunuu lava.

Ao lenei itula, lau Afioga i le Minisita o Aoga, manaia ma aulelei ia le faleaoga o le matou nuu i Vailoa, ia pau lea o le faleaoga na manuia i le Paeaiga ua tuanai atu nei, ia ona ua faatamaia foi e le afi lo matou faleaoga. Ae talitonu o lea ua fai e le Malo e ala mai i faamanuiaga o le Inisiua, ia e momoli atu ai le agaga faafetai i lea tulaga.

E tele nisi galuega, e tele mea o lo o manaomia e le itumalo i lenei taimi ae talitonu, tatou tuu ia i luma, i se isi Faigamalo, ia atonu e maua mai ai se fesoasoani mo lenei itumalo mo le agai atu i luma. O lea foi o lo o lavea ia le matou itumalo i le auala lea sa fai atu e le Malo e alu atu tau i Malua, o lo o ui atu, manaia, lelei, lelei fuafuaga. Ia ua lelei foi mo matou o lo o nonofoma alala, ia ae talitonu o lo o i ai nai auala i tua atu, e aoga ona tatou tilotilo pea i ai mo le agai i luma, ia ae tatou tuu ia i se isi Faigamalo, ia ma i latou o le a omai, ia atonu e maua ai se faaola totoga o lenei itumalo i ni galuega. Ia na pau ia o galuega e lua ua ou talitonuina sa fai i le itumalo lenei.

O le agaga lava ia lau Afioga i le Fofoga Fetalai, e leai e le o faatautava po o taumafai atu e faaleaga le tatou Malo. E leai, a i ai lava ni manatu e ao ona faataatia atu aua le tatou agai i luma, mo le lelei o le itumalo. Ona ave lea o lau faafetai faapitua i le Faamasinoga i le tulaga i afioga i alii faamasino, aua ana leai le faaiuga, faapenei ou te le o tulai atu i le taimi lenei lau Afioga, faapenei ua uma au i le masina lea na tea atu nei. A o le mea sili o lo o i ai le Faamasinoga o lo o fesoasoani mai pea i mafatiaga pe a manaomia i le tele o taimi. O lea e momoli atu ai le faafetai tele. E le umi se talanoa lau Afioga. O lo o malamalama foi le matou itumalo i le sui usufono lenei, i le susu o Susuga i Faafeagaiga eseese o le matou itumalo. O le a ou le taea outou suafa, o lena tou te malamalama aua tatou te feiloai lava i le tele o taimi. Na pau le agaga ia outou tatalo mai aua taumafaiga a le sui usufono mo le tausaga fou, aemaise foi o le faiga palota o lo o tatou agai atu i ai.

Ia, ona faapea lea o se faamatalaga, i le Tala o le Tupe o lo o taatia nei i le Maota Fono, ia e leai se tala tele foi e fai atua, na pau le mea na o le piinama atu i lau Afioga i le Minisita o Tupe, o lena e i ina ia te oe le tofa ma le faautaga e faasoai. E leai ni o matou manatu e fai atua, aua e pule lava outou, ae na pau le mea ia alofa le Atua ia fesoasoani i lau Afioga i le Minisita o Tupe ina ia faasoai lelei aua le tatou atunuu atoa. O a foi ni fuafuaga a le Malo o lo o i ai i galuega fai, tatou vaelua tutusa, tatou alolofa uma i itumalo o le tatou atunuu, aua ne i sii nisi itumalo, ae tosotoso atu nisi itumalo lau Afioga i le Fofoga Fetalai.

O le matou itumalo i Faleata 2, o lenei o le a tatou sauni atu i le faiga palota mo le tausaga fou. E fou le tatou itumalo, ae le masani, e le faapea o se mea

tatou te le masani ai, o lea foi sa fou i le la Paeaiga, ia o lea foi ua toe fou i lenei Paeaiga. Ia, e le i i ai lava se mea fou ua tatou faiaina ai. A o faafofoga mai le itumalo, Susuga i Faafeagaiga eseese, ia tatou tapuaia o tatou faiva aua le tatou alo atu i le tatou faiga palota.

Lau Afioga i le Fofoga Fetalai, ia ona avatu ai lea o se faamatalaga, ou te talitonu o lea ua e faamavae, ia alofa le Atua e fesoasoani i lou ola ma lou malosi, matou te tapuai atu ai. A maua foi se avanoa e afe atu, leaga e faigata o oe e tama i ai, e tama i ai Afioga i sui usufono, e afe atu foi. Ia faapena foi i lau Afioga i le Palemia, a i ai foi ni mea e manaomia ai, ia o le a ou toe tuitui atu foi. Na pau lava le mea ia e alofa, ia e alofa mai ma ia e alofa ifo ma e alofa atu ia maua ai pea le tatou nonofo fealofani aemaise foi le faafetai faapitoa i Taitaifono o le Komiti sa ou i ai i le Komiti Faapitoa a le Palemene i tulaga o galuega tetele le Afioga ia Tafua. Faafetai foi mo le faafoeina o le tatou galuega, e le i faigofie. E faigata foi i isi taimi i lou silasila mai, ae o le agaga lava ia o le fia lagolago i galuega fai a le Malo. A i ai foi se mea ua faaletonu ai le auauna nei lau Afioga i le Tuiatua Faanofonofo, ia malie, faamagalalo mai pe a faapea ua i ai se tulaga faapena ua i ai, aemaise foi o le mamalu o sui usufono mamalu o le Palemene, o outou e taua i itumalo, e pei foi o le faataua e lo'u itumalo o le latou sui usufono. Tatou te galulue faatasi, pe tatou te le malilie faatasi i se tulaga ua i ai, ua i ai lava lo outou talitonuga, ua i ai foi lou au talitonuga. Na pau le mea e momoli atu alofaaga ia outou uma i le tulaga o lenei faiga palota o lo o fougou mai nei, ia, ia alolofa outou itumalo aua le faiga filifiliga a Samoa o lo o i ai, aemaise foi Afioga i Minisita Lagolago, ioe. E tele lava ina fai mai le vaega lea e leai ni tou galuega e faia, ae talitonu le agaga o lenei e tele le tou fesoasoani i Afioga i Minisita. Ia tumau ai pea, tumau ai pea le galuega lagolago, ioe. Atonu e faamanuiaina outou i le faiga palota o loma mai, ona see foi lea o le isi vaega i tua, ae see mai outou i luma. E faapena foi i lou uso a sui usufono i Faleata 3. Ioe. Amuia oe ua e oo i lou Malo. Ioe, a e oo i lou Malo, ia e manatua mai maua ma le Afioga i le sui usufono ia Salausa. Ioe. Ae talitonu le agaga, o lea o le a i ai isi fou ia o le a fougou mai lau Afioga Leala. Ia o le tatou galulue faatasi lava, ioe. Atonu tatou te eseese i le tele o tulaga, leai, o le agaga lava e tasi ina ia manuia Samoa.

Ia, ona oo mai lea o se faamatalaga mulimuli i le Komiti lea sa taitaia e le Afioga ia Gatoloai, malo le galue. Ioe. E tatou te le au uma i le fuafuaga, ae o le faalavelave, o le mea ua tofia ai outou e le Malo, ina ia faia le galuega i le mea e gata ai le tou iloa. E le masalosalo foi matou i le faatinoina o le tou galuega. E ui lava ina eseese o tatou manatu, ae talitonu le agaga, e filifili le tatou atunuu i le tulaga ua i ai. Talosia, talosia ia ia aua ne i tulai mai ni faaletonu mo le agai i luma aua se lelei o Samoa.

Ia, ona ou oo mai lea i le Ofisa o le Fono lau Afioga i le Failautusi, e ui lava ina e le alofa i nisi taimi, ae ou te alofa lava ia oe. Faafetai o lea ua maua mai lau pay slip nei, ua maua uma le pay, ae ave uma e le tax le afa, ae le

afaina, o le mea sili o lea ua maua e fesoasoani ai foi mo le agai i luma. Ia ma le mamalu o Matagaluega a le Malo, e le faigofie la outou galuega, o le tautuaina o le Malo i tulaga o galuega faatino, ou te talitonu e le faigofie, ae ou te iloa e tatau lava ona outou taumafai pea e ave le tuualalo ina ia lelei ai mo le agai i luma o le tatou faigamalo. Po o ai lava e tulai mai, ia ave pea i ai le fautua. Aua ne i o tatou fefefe, aua ne i o tatou alo, a ia tatou fautua i le mea e gata ai le fautuaga. Ia o isi foi tagata e afaina ai pe a fautua soo, ae talitonu le agaga o i ina o lo o i ai le toa o le loto ina ia mafai ona faagaioi ai fuafuaga.

Ia, Samoa o lo o tapuai mai, faafetai mo le tapuaiga i leni 5 tausaga ua tuanai. E le faigofie foi le galuega o lo o alo atu i ai le Malo aemaise Afioga i sui usufono. E le sao foi matou i le tele o taimi. E i ai lava taimi e i ai fita, e i ai foi taimi e faaoga ai lava le agaga o le manatu o le Afioga i le sui usufono aua le agai i luma ma le lelei o le tatou faigamalo. Ia ne i te i ua misi se isi vaega e mafai ona momoli atu i ai le faafetai, a o lena tou te faafofoga mai, ia manuia lava le tatou alo atu i le faiga palota aemaise foi fuafuaga a le Malo, aemaise foi Samoa o lo o tapuai mai i atunuu mamao. E le mafai ona galo outou aua le tou fesoasoani o lo o aumai pea mo le tatou atunuu, ia o tupe maua lava ia e aoga mo tatou uma aemaise le faigamalo.

Ia ona faapea atu ai lea o se tala i leni itula, sui usufono uma, good luck. Lau Afioga i le Palemia, good luck. Lau Afioga i le Fofoga Fetalai, ia manuia ou faiva, and have a good rest. Faafetai.

Susuga Hon Papaliitele Niko Lee Hang: Lau Afioga i le Fofoga Fetalai...

FOFOGA FETALAI: Malo saunoa i lau afioga i le sui usufono mamalu. Malie foi le faalogologo, ia, ua logomalie, ua fofoga foi le Atua ua faafofoga foi le atunuu aemaise o le Palemene. E faapena le sausau faa-toeaiina, e le saili masei ae sausau i le tulaga e taoto i ai lou finagalo ma le tofa e aumai e le Atua.

Malo faafetai, e ui lava foi ina taumafa ma le foa mea a Losi e tusa o lea muagagana, ae i ai le manatu o le upu a Solomona, aua e te tali atu, aua tatou te saili masei ae tatou maua i le loto faamagalo. O le agaga maualuga lena. O le mea la lea, ua malo saunoa ua malo foi malele e tusa ai o lo ouluga finagalo e ala i le Tala Faaopopo Muamua o le Tupe. Ia o le matou tatalo foi, matou malolo i se taimi e faataape ai le Palemene, ia matou tapuaia outou faiva o lo o outou faamoemoe aua foi le faiga palota i le lumanai, ina ia filifili mai ni toa aua foi ni sailigamanu aua Samoa ma lona Malo.

Ia, o le tali atu lea ma le faaaloalo i lau saunoaga matagofie i leni taeo ma leni aso. Ia, ua avanoa foi le nofoa mo se isi saunoaga.

Ia se i tulai mai le Minisita mo Galuega faamolemole Papalii.

Susuga Hon Papaliitele Niko Lee Hang: Faafetai mo lou avanoa i lau Afioga. Sa le i fia faalavelaveina le saunoaga matagofie a lou uso a sui usufono. O le isi vaega lea o le Tu Taulaga o Sisifo Faumuina a o Sasae au.

A o lou tulai atu ma le agaga faaaloalo ona sa afea foi i le saunoaga le uafu foi lele i Vaiusu. E matau lava i le tele o taimi o le Afioga lea a Faumuina sa tetee i le uafu lea e oo mai lava i le taimi lenei lea foi sa tau mai lava e le o talia e ia le uafu. Na o sina tala lea lau Afioga mo le silafia, o le uafu lea i Matautu, ua congested tele, ua le lava le space. A outou tagai foi i containers la e pe 10 containers e faaputupu i luga, e le lava se avanoa. E i ai foi la taimi e ono omai ai ni vaa oloa se 3 po o se 4 e fia unload i se taimi vave lava, ae le mafai leaga e le o tele se tatou uafu.

E pei o le agaga la lea o lea e tapena ai e le Malo se uafu i Vaiusu, ma ou te talitonu e tele foi ni faamanuiaga e maua e le afioaga aemaise o le itumalo pe a tino mai le uafu lea.

O le taumafaiga la lena e fia faailoa atu pea i le Afioga i le sui usufono, o la ua i ai le fuafuaga mamao a le Malo le uafu lea, ma pe tulai mai foi se isi faigamalo, a o lea ua faataatia e le HRPP le tulaga lea, a le mulimulitaia, ua afaina le itumalo ua le maua le tele o faamanuiaga. Na pau lea o le mataupu na ou fia tulai ai, ua ou faamautu atu ai lava le tulaga lea leaga ua alu tapenaga a le Malo i le faiga o surveys ma mea ia i le uafu lea. Ma ou te talitonu o se galuega poloketi aoga foi lea, e le gata i le itumalo ma le afioaga, ae mo Samoa atoa.

O se faauilavea lea sa tau tulai atu ai, ae sa manumanu i le saunoaga suifefiloi a le Afioga i le sui usufono lea e faapea mai e alofa ae toe le alofa. Ia, faafetai.

FOFOGA FETALAI: Malo. Ia se i tulai mai Lealailepule, le isi sui o le tu taulaga.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, faafetai lava. Sa le fia faalavelave pei ona e fautuaina foi tatou sui usufono i lenei aso. E pei o aso faaiu o le Paeaiga, e taatia pea Afioga i sui usufono i latou finagalo. Ia aua sa fia oo foi se manatu, ae sa faapea, ia o la ua faafofoga le itumalo i le finagalo o le sui usufono. Faafetai. A oo foi i le taimi o au, ia ona avatu foi lea o le matou mafuaaga. E silafia lelei e le Maota, o le itumalo lenei o Vaigaga i le taimi nei, o lea lava e i lalo o Lealailepule, ma Vaiusu, e le i uma le taimi o Lealailepule.

O le taimi foi o Lealailepule na uunai malosi ai lenei mea. E silafia foi e toalua sui o Vaiusu ia e o i le palota o lea foi e i le Malo. O lona uiga, o lea e lagolago foi i le mea lea, ae faafetai i le sui usufono o lea ua faaali lona finagalo. Manatua o le taimi lenei, e faaali lava le finagalo o le sui usufono ia aua tatou te fia malo uma lava. A oo foi la i le taimi e maua ai sou avanoa, ia ona avatu foi lea o au mafuaaga i mafuaaga e ala ai ona lagolago e

Lealailepule ma isi sui o le Malo le atinae taua lea o le a faatino i totonu o lona itumalo. Ia ma le faaaloalo lava. Faafetai.

FOFOGA FETALAI: Malo. Ia se i tulai mai le Afioga i le Palemia. Malie le sui usufono se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, na ona ou toe tulai atu e faapoopo atu i le saunoaga a le Afioga i le Minisita o Galuega. Lea ua saunoa maoti lava i fuafuaga mamao ia a le tatou Malo, ma e ono faatino i le Nofoaiga fou, ia pe omai lenei Nofoaiga pe leai ae omai nisi. Ae o le faamoemoe lea sa fai i ai suesuega a inisinia, ia Professor Rodkivi i le Nofoaiga lea i le 1970 agai mai i le 1972. O le faamoemoe na i ai, se i saili se uafu o le lumanai. O findings, o le lipoti atoa lava, masalo pe toeitiiti atoa le 4 inisi le mafiafia, ua taunuu ai i le faaiuga, o le uafu lea e tataua ona faatu i Vaiusu, o le uafu lea o le lumanai o Samoa.

O le uafu lea i Matautu, o lo o tele lava le afaina o lo o i ai i le uafu lena ona o le malosi o le au, o swells, ocean swells ma e le mafai ona aveeseina le afa o le tausaga e oso ai galu tetele, sau le au i lalo e tui e vaa le uafu. O le ala foi la lena o uafu ia na fai, e fai ma toe faafou ona o le malosi o le tuiga o le uafu e vaa e aafia ai ma vaa. O le ala foi lena a oo i le taimi lena ona alofia lea o le tatou uafu e meli tetele ma isi vaa tetele. O le faamaoniga o lena mea, lea na iu lava ina paulia ai, ua toso i luga o le aau le vaa tele lava o Samoa le Forum Samoa, masalo po o le 8 tausaga talu ai. O le mea la lena e le manafonofo ai le Malo lenei i le vaai mamao agai i le lumanai, ua matua le ofi le uafu i le taimi lenei. O a ni teuteuga e fai i ai, na o ni teuteuga foi lele e fofu ai ni faafitauli lata mai, ae le mafai ona aveesea ai le faafitauli lea e tumau e faavavau, o le malosi o le au lea e sau mai fafo.

O lea la ua uma ona fai uma suesuega, ua uma foi le faatalanoaga ma le faatupega. Na pau lava le mea ua tau tuai teisi ai le faaiuga o mea nei ona o le koviti lea e taofia ai i latou foi mai fafo. A ua uma lava ona fai suesuega a le uafu lea i i po o e site lea i i i Vaiusu, o le site aupito sili lea ona sefe mo vaa i le lumanai, ona e le afaina ai vaa i Vaiusu. Ua uma lava la ona faataoto ia fuafuaga, toe lava o le faamaea o le faatalanoaga o le faatupega.

Sa i ai le faamoemoe e malaga mai le Peresetene o le Malo o Saina i le tausaga talu ai i le taua tele o le faamoemoe lea, peitai ua feagai tatou ma le faamai. O lona uiga lau Afioga, ua uma ona faataoto fuafuaga mamao ia, ma o le tele ia o vaa ia e ono afea Samoa pe a oo ina faatino le faamoemoe lenei, ma o le tulaga foi i galuega, o le a matua tele lava o galuega o le a tulai mai ai aemaise i le taimi nei ma nisi o pisinisi ua fia faatuina e faaaoaga ai le uafu a ua le lava le uafu o lo o i ai nei.

Ua ou taua lea mea lau Afioga i le Fofoga Fetalai, ona i lalo o le Faavae o le Malo o Samoa, e matautia foi le mamao o le vaai a tama o le Faavae, na latou faataoto ai i lalo o le Faavae o ogasami uma lava o Samoa e tau i le matafaga i le mea e oo i ai le maualuga o le tai oooo, o eleele uma a na i lalo o le Malo. So o se mea o Samoa, o eleele uma a na e i lalo o le Malo. Aisea? O le mamao o le vaai a taitai o Samoa i le tulaga o le puipuiga o le gataifale ma le tulaga ina ia le taofia ai le Malo e faatino ni atinae tetele i luga o le tulaga ua faalavelave se malosi e ese ai. O le tulaga la lena o lea e ala ai ona taua tele le itu lea. Aisea? Aua foi o le tagata ia, e manatu lava ia na o ia i le taimi nei. A na leai le Tulafono Faavae lea, semeamanu e oo lava i matafaga uma o Samoa ua pu pu uma i le lauga o le oneone, ae afaina ai mea o aualatetele. O lea e e oo mai nei la e pisa ai lava isi Malo e tai pei o Niu Sila. O le tau laa atu lava i i taofi, leaga e pule ai Maori. E mamao tele le tofa na fai ai mea ia. O le tele foi la o latou ia e tetee ma le faataotoga o ata ia ua ou vaai i ai, e leai lava se mea e aafia ai le siosiomaga, ona e le aafia togatogo ia.

Lau Afioga i le Fofoga Fetalai, e tele a le le malamalama. A o le tulaga lea e i ai, a faatino le mea lea, o le mea moni lava, o i ina uma lava i Vaitele alu atu i uta i Tafaiagata, e ono aveva o le isi vaega tele lea o le taulaga, o Vaiusu, Vaitele, Vaigaga. E le mafai ona oooo i ai le vaai mamao a le e le malamalama i ia mea, o mea o fuafuaga mamao ia ua uma ona taoto. E le taugofie le galuega, e taugata. A o le ala foi lena o lea e taoto ai le fuafuaga, e alu faasolosolo, e i ai le vaega muamua, e i ai le vaega lona lua, e le itiiti ifo i le 12 vaa e mafai ona taula i le taimi e tasi. O tai, e lua lava vaa, tumu i le phase 1, vaega muamua. O lona uiga, e le laitiiti le galuega. O le a faagata i i lau faamatalaga ae mo mea o fuafuaga mamao faapea, e le mafai ona oo i ai le malamalama o le tagata e puupuu le vaai, na o e ua malamalama i fuafuaga mamao e fua mai, e manuia ai le atunuu mo le 100, 200, 300 tausaga i le lumanai, aua o le uafu e mautu, o le uafu e tumau, o le uafu o la e matua mautu lelei le tulaga o i ai, e le o aafia i tulaga ia sa ou taua muamua.

Lau Afioga i le Fofoga Fetalai, o le faamalamalamaga lena, ma o le mea moni lava, e faatino loa le mea lea, ona ou faapea atu lea, o le tele o tatou tagata la e i fafo e toe fia omai i totonu, ona e matua moomia lava ni tagata faigaluega, ma e ono tele pisinisi o le a tulai mai e galueaiina ma vaatetele o le a afea aemaise o mea o vaafagota e omai ina ia fagotaina le i'a, ona o le tulaga lenei e aveva pea Samoa ma le laumua o vaafagota e mafai ona oo atu i isi ogasami ma omai i inei, ma faagaoioi ai le i'a mo le lauina atu i fafo. O la e lava ua amata i le taimi lenei, o la e ua alu i le taimi lenei le tulaga lea, ma o lea ua feoloolo nai pisinisi ia ua faaali mai lo latou naunau e fia faatuina i Samoa. O galuega na mo fanau o le lumanai.

Lau Afioga i le Fofoga Fetalai, o se faamalamalamaga lea ina ia manino lelei i le tatou Maota o lo o faafogafoga i lenei faamoemoe taua, o le isi lea atinae matautia, o le atinae tele le atinae lenei. Ia manuia le tatou Fono.

FOFOGA FETALAI: Faafetai. O lea ua manino le faamalamalamaga a le Palemia, malie...

Afioga Faumuina Asi Pauli Wayne Fong: Lau Afioga i le Fofoga Fetalai, e le toe faia se lauga i le tulaga lea o lea ua taatia le manatu o le Afioga i le Palemia.

FOFOGA FETALAI: Malie lau Afioga.

Afioga Faumuina Asi Pauli Wayne Fong: O lea e faafofoga mai le matou itumalo, a faapea lava e au i le uafu, o la e ua i ai sui e omai i totonu, ae a faapea e le au i le uafu, ia o la e foi e i ai le moana sausau e toulou i ai pe a uma le faiga palota.

Ia o si toe fesoasoani atu lea. Ia manuia le Fono.

FOFOGA FETALAI: Malie, o lea ua ou fesoasoani atu. Se na manaia lava lau saunoaga Faumui, a o lea foi ua e toe saunoa ma taua upu faauigalua. O la e sa i le tatou Tulafono Tumau saunoaga faauigalua, o la e sa. Ae ou te musu foi lele ou te fana i le tuitui lou finagalo leaga ne i te i ua faitauina ma molia ai foi le Fofoga Fetalai i le malu o le tai taeao ae aua e te faapena, leaga...

Ia silasila la oe o lea o le a ou fai atu. Nofu i lalo, nofo i lalo, nofo i lalo. Vaai oe ou te le i tulia lava se sui usufono. Nofu i lalo.

Afioga Faumuina Asi Pauli Wayne Fong: A lea sa e tulia muamua au lau Afioga a o lea ua ou toe sau?

FOFOGA FETALAI: E ese le tuli lena o le Tulafono, a o le tuli i le power o le Fofoga Fetalai. A ou fai atu loa e te alu i fafo e te le toe Fono seiloga lava e faataape le Palemene ona e alu loa lea i fafo. Ioe. Se tatou faapena. O le saunoaga ma le faamalamalamaga mulimuli lava o se mataupu, o le Malo. Leaga o lea sa e laga le mataupu i le uafu, a o la e manino. E le pau foi lena o le Nofuiga na tautau ai le uafu lela, ioe. Masalo po o le isi 2 i le 3 Nofuiga talu ai o tautau lava le uafu lea, leaga e le faia i se taimi e tasi, e le itiiti foi tupe e alu ai. A o le faapupulaga ma le faamoemoega o le Malo, e aoga mo le atunuu lautele. E le faapea la o le a ave ifo le finagalo o le sui a usufono lava latou e taofia ai faiga faavae a le Malo. Leaga o la e fai mai le Faavae, so o se mea lava e oo i ai le sua a le sami, ia o le mea lena e pule ai le Malo. O le mea la lea ou te musu e talatala atu i tua, leaga o lea e afifio mai le Palemia ma le Kapeneta, o le latou fatuaiga tausii lena a latou. Na pau o le mea na o lou taofiofia o le tatou Fono leaga o lea o le a e tulai mai e fai lou finagalo, o lou lava lena finagalo. Ioe. A o le faapupulaga a le Malo, lea ua uma ai foi i ma ua malamalama le mataupu.

O le mea la lea ou te faamalulu atu ona o lea o le a e tulai mai e fai le ta finauga, ae leai e le faapena, aua ta te finau. Se e lelei le uma o le Paeaiga ma faataape le Palemene tatou te le o tauaimisa. Ioe, o lau tala lea. Tulai mai e... ua uma ea lau saunoaga... ia ua maea. Aua o lea ua uma ona e faafetai ua leai se vailiu e le i oo i ai lau faafetai. Ia, o lea foi ua ou faapai atu...

Afioga Faumuina Asi Pauli Wayne Fong: E momoli atu malu i puega i lau Afioga i le Fofoga Fetalai. E leai foi se faafinau, o lea foi ua malamalama. Na pau lava le mea na ou fia tali atu ai o le tulaga lea i le puupuu. E sao ou te puupuu, ae le puupuu le finagalo ma le manatu lau Afioga i le Fofoga Fetalai. O le mea sili o lea ua faamalamalama mai e le Afioga i le Palemia, ae maumau pe a na... po o fea la e aumai ai le tupe e fau ai, ona atili ai lea ona tatou malamalama. Faafetai lava mo le avanoa.

FOFOGA FETALAI: Faafetai. Ia, e i ai se isi sui usufono e tulai mai e saunoa, o lea lava e lava le taimi.

Ia se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, se ou te alofa tele i le tatou Maota nei, ona o lea faatoa amata o le aso muamua leni, a o lea foi ua ou vaai atu ua toeitiiti ta le 1:00. O le a sou finagalo, o e o le a fia saunoa o le a tele le aso a taeao.

FOFOGA FETALAI: Malo faafetai. Faafetai mo le fautuaga. Ia o tatou e faapena, o Fono a Taitai o le atunuu e aumai le tofa, avatu se matou faamatalaga, ia tatou faufau lea mo a taeao, saili foi le malosi.

Ona faapea lea, o le a faapena ona fai, o le a tatou vave manava. Na o le 15 minute lea e televave ai le taimi tatou te malolo ai nai lo le taimi masani.

Ae tatou te le i tolopo, ou te tapa ma le faaaloalo lau Susuga i le Aoao Fesoasoani, le sui usufono mo le itumalo o Faasaleleaga Nu 3, lau Afioga Tofa Foleni, tulai maia e faaiu le tatou Fonotaga i se tatalo.

Na tolopo Taulumaga a le Fono Aoao Faitulafono i le itula e 12:47 i le aoauli seia aulia le itula e 9:00 i le taeao o le Aso Lua, 20 Ianuari 2021.